

海南叢書

第九集

抱志
經親
閣堂

馮林韓
驥燕錦
聲典雲
著著著

海
南
林
氏
書

海口海南書局印行

編印海南叢書小啓

瓊崖島峙南陲。內聳五指蒼翠之高峰。外環萬里汪洋之大海。山川鍾毓。代有達人。其勳業氣節。載在史籍。昭昭然矣。至道德之蘊。發爲文章。或詞藻紛披。或名言至理。各有專集。未廣流傳。追念前哲。遺訓欲墜。滋可懼也。敝書局有見及此。爰搜集歷代諸先達家藏遺稿。彙刊成書。名曰海南叢書。凡章奏、記序、論辨、傳贊、銘誄、碑誌、行畧、祭文、祝文、簡札、公牘、以及詩詞歌賦、體無不備。計二十有一種。分訂九集。定價大洋十二元。四折發售。各界人士。人手一篇。處則可以問學淑身。出則可以補家敝國。尤其是瓊崖人士。欲窺見鄉先達之文章氣節。道德經濟者。更不可不口誦心惟。以步武前賢。啓迪後學也。此啓。

南海叢書全集目錄

集五	集四	集三	集二	集一
陳中秘稿 陳檢討集 鍾筠溪 張事軒	天池草	鷄肋集 湄丘集 傳芳集	備忘集	瓊臺會稿
陳是集 陳縉 鍾芳 張子翼	王宏誨	王佐 邢宥 唐胄	海瑞	丘溶
集九	集八	集七	集六	
白鶴軒 志親堂 抱經閣	關道堂	筠心堂	石湖遺稿 北泉草堂 梁中丞集 許忠直集 松谿小草 揚齋集	鄧廷鵠 林士元 梁雲龍 許子偉 王懋曾 王承烈
韓錦雲 林燕典 馮驥聲	雲茂琦	張岳崧		

本傳

白 鶴 軒 集

韓錦雲，係廣東瓊州府文昌縣人。由廩生中式。道光乙未恩科舉人。庚子恩科進士。欽點翰林院庶吉士散館。以主事用。籤分刑部山東司。咸豐元年補奉天司主事。三年陞雲南司員外郎。四年三月陞江蘇司郎中。考御史欽取第一名。六月補授浙江道監察御史。五年二月轉掌貴州道監察御史。六月稽查內倉。七月署戶科給事中。八月署兵科掌印給事中。順天鄉試內場監試。十二月補京畿道監察御史。六年六月轉掌京畿道監察御史。十月考繙譯筆帖式內簾監試。十二月陞授戶科給事中。七年四月兼署刑科給事中。五月截取以繁缺道用。六月稽查萬安倉。八年二月補授四川鹽茶道。九年八月兼署四川按察使司。十一年正月捐修四川省城濠加鹽運使銜。二月間訃丁繼母憂回籍。同治二年五月服闋。三年四月到部。四年五月補授雲南糧儲道。五年署雲南布政使司。六年兼署雲南按察使司。九年省城解圍。奉

旨賞加二品頂戴花翎。五月奉准吏部咨催入京引見。因滇省軍務未竣。奏請暫緩赴部。十年二月兼署雲南鹽法道。十二年五月全滇肅清。遵卽請委接署。十二月到部引見。奉旨回本任。十三年九月到任。十二月初五日在任病故。享年六十九。

本傳

韓錦雲，字紫東。宋先儒忠獻公後。末世有官於廉瓊者。遭亂不能歸。遂占籍於瓊之文昌縣。父庠士之珍。篤學謹厚。載邑志懿行傳。錦雲初生時。父夢白鶴集於頭門。妙齡聰穎異常。年十二能文。弱冠補弟子員。屢試第一。食廩餼。道光乙未舉於鄉。庚子成進士。膺館選。與族再姪捧日同登會榜。士論榮之。未幾丁外艱。服闋。散館改刑部主事。咸豐三年轉雲南司員外郎。四年補江蘇司郎中。考取御史第一。補浙江道監察御史。嘗疏陳畿疆事宜以救飢民。五年署戶兵科給事中。充順天鄉試內監試。六年十月考繙譯筆帖式內簾監試。十二月授戶科掌印給事中。時爵臣葉名琛督粵。與歐西洋人交通奇貨。錦雲疏劾之。謂其溺職辜恩。將來廣東不可收拾。勢必禍延沿海。疏入甫兩閱月。洋兵果陷廣東。葉督被虜。掠浙江。逼畿輔。襄師辱國。莫甚於此。文宗始悔不用忠言。嘉嘆久之。從茲直聲震天下。時論以海忠介

白鶴軒集

後一人稱之。八年授四川鹽茶道兼署按察使司。遇駱文忠督蜀。最推重之。旋丁繼母內艱。回籍守制。服闋赴闕。同治四年。授雲南糧儲道。時滇省禁亂。巡撫林鴻年遠巡不進。錦雲銜命即行。至境叱馭不稍卻。滇督岑襄勤以山斗仰之。官民以長城倚之。岑督外勦。錦雲內守。布政按察二司以一身任其艱巨。日夜防禦。籌畫機宜。卒解省圍。十二年全滇肅清。賞花翎二品頂戴。當軍書旁午之餘。猶時展讀詩書。講求義理。其官畿輔時。與門下士潘存齋切心性之學。坐而言。必欲起而行。非徒托諸空談也。所著有白鶴集二卷行於世。

白 鶴 軒 集

韓紫東先生傳

先生名錦雲。字紫東。文昌縣人。宋名臣韓忠獻公後。代有聞人。爲海南鼎族。傳至先生以文章經濟著於時。自少姿稟過人。卓有文名。未弱冠游庠。肄業瓊台。院長王揚齋一見。刮目相待。許爲國器。非同院諸生所能及。道光乙未領鄉薦。庚子成進士。叨館選。此科與族兄捧日同登會榜。海外二百
年所僅見。傳爲科場嘉話。散館二等以主事用。籤分刑部山東司。咸豐元年
補奉天司主事。三年升雲南司員外郎。四年三月升江蘇司郎中。考取御史
第一名。六月補浙江道監察御史。五年二月轉掌貴州道監察御史。七月署
戶科給事中。八月署兵科掌印給事中。順天鄉試內監試。十二月補京畿道
監察御史。六年轉掌京畿道監察御史。十月考繙譯筆帖式內簾監試。十
二月升授戶科給事中。七年四月兼署刑科給事中。五月截取以繁缺道用。
八年二月補授四川鹽茶道。九年八月兼署按察使司。十一年正月捐修省城
濠加鹽運使銜。二月聞繼母訃奔喪歸藉。同治二年服闋。三年到部謁選。四

白鶴軒集

年補授雲南糧儲道。五年署布政使司。六年兼署按察使司。九年省城解圍。賞二品頂戴花翎。十年兼署鹽法道。十二年全滇肅清。方先生官御史時。正英夷肆擾邊海之日。遂抗疏條陳廣東侵擾情形。夷人入內河占據礮台。制軍控御失宜。鄉人公憤抵禦。制軍走入內城。請通事議和並及各省防守等議。當是時中原承平日久。兵制廢弛。沿海沿邊封疆大吏未盡得人。遇此夷人猖獗。兵輪堅礮。縱橫海上。何策以禦之。倘能用先生言。飭沿海嚴防。選將選兵。密爲布置。隨時督練。激厲士卒。守則有備。戰則有謀。何至有瀕海行省。此陷彼失。震及京畿。貽君上宗社之憂哉。先生又奏廣東督臣玩延貽誤諸疏。痛陳利害。不急整軍經武。制府得人。將來廣東不可收拾。禍延沿海。未幾廣東果陷。英夷虜總督葉名琛載游歐洲。喪師辱國。爲二百餘年所未有。而南省失陷。破天津。入畿輔。疆臣無防守之策。廷臣少禦侮之才。中原大局之壞。胥由於此。噫。是誰之過與。先生禍燭先幾。預防後事。奏未二月。其言悉中。使諫臣僅獲敢言之名。地方實受夷人之禍。則先生


之言切而其志苦矣。復陳畿疆事宜以救難民。督撫參劾失實。保舉司員過優。又疏陳外省吏舞弊。剴切指陳。上足以整肅官方。下足以嚴革叢弊。吏治之整頓。庶能培國脉而固人心。本朝二百年來之御史。其敢言直諫。有關國家大計者。錢園南謝梅莊而後。先生其一矣。夫能言而不能行。未足以徵經濟。自古矜言氣節之士。往往有之。先生官雲南時。正值回匪四起。道塗梗絕。省城戒嚴。布政按察三司。俱未履任。先生以一身兼署二司。籌餉籌兵。軍書旁午。內何以守禦。外何以剿撫。總持大局。慎固封守。堅持二年餘。始能解省城之危急。又二年全滇始能肅清。其策應機宜。禦防謀略。前見諸奏疏者。至此審機應變。及身行之。乃能收其實效也。然當軍務倥偬之際。坐鎮從容。不動聲色。猶與同官倡和賦詩攄懷。其儒雅之風度。更非近時司道所能及也。十二年季冬。病卒任所。著有詩文集二卷。

鄉後學王國憲初稟

白 鶴 軒 集



本
傳



八



白鶴軒

白鶴軒集目錄

文集

奏疏

奏廣東英夷滋擾情形疏

奏英夷滋擾督臣玩延貽誤疏

奏逆夷竄入省城須分路夾攻以圖收復疏

奏廣東江面土匪聚掠請旨嚴飭查辦以靖地方疏

奏外省例設書胥牘寫詞狀應嚴行查禁以杜弊端疏

奏畿疆業已肅清從前彼賊裹脅難民來京生理者懇恩免究疏

奏督撫參劾屬員應據實陳奏從嚴懲辦以儆貪墨而肅官箴疏

奏海運司員保舉過優比例瀝陳疏

奏各州縣考試文童受財枉法請旨嚴禁以肅吏治疏

目錄

圍攻英夷檄

補授雲南糧儲道員缺謝恩疏

兼署雲南臬篆謝恩疏

記

重陽度昭化天雄關記

三溪社學記

序

四川己未恩科武鄉試題名錄後序

雲南武鄉試錄後序

昌述村翻刊族譜序

林環溪先生八旬晉四壽序

欽加同知銜署瓊州府海防同知知瓊山縣事加三級塔生金老父台大人五

白 鶴 軒 集

旬大慶榮壽序

傳

李母楊太宜人傳

頌

署文昌縣劉望三德政頌

贊

崖州營游戎唐泰清像贊

陳清如先生像贊

李萬年先生像贊

潘子善餘母吳太孺人像贊

盧廸甫像贊

銘

目錄

韓碧湖暨郭安人合葬墓志銘

賦

石鼓賦

文

哭孫肇元文

信

寄文淵先生信

詩集

丙寅五月十九夜夢中得詩云冠裳采色唐虞盛草木暉日月長醒後記去

年放糧道卽是日也一官瓜及萬里蓬飄吉夢爲何因用其詞及其意作七

律二首

彭子嘉由南書房京察一等轉補御史升授雲南鹽道前途阻梗淹留川楚所

植蘭一朵九出馥郁異常余赴糧道任同處逆旅作此以破岑寂丙寅五月

二十日

鹽糧道署在滇省城內彭子嘉不樂赴任以當事者皆武人也作此以促其行
彭子嘉苦病思歸見于詞色作此以慰之

丁卯上巳宋小墅前輩招往龍潭修禊同遊者二十三人分韻賦詩看核具陳
笙歌迭奏比右軍蘭亭實爲過之余拈韻得集字

和李銘珊刺史龍潭修禊原韻

丁卯重九馬培之協戎招飲席上讀宋小墅前輩賞菊詩次韻奉和

丁卯重陽偕寮佐登五華山時迤西軍務未息各賦詩寫懷仍用宋小墅賞菊

原韻

周漱泉山長植梅二株于五華書院學半堂前并紀以詩此梅乃龍泉寺道人

所贈時昆垣戒嚴余辦防勦事務草二致和工拙不計也

和沈朗山海心亭公謙詩二首

戊辰封篆日作

和朗山贈余封篆詩

沈朗山玉笙樓詩稿各體皆備人目爲詩狂作此以戲之

沈朗山答余詩云邇來遇敵僂先怯咫尺軍中有一韓余非敵也依韻奉酬

沈朗山贈紅頂一顆以詩報之

沈朗山脊口在蜀無以爲家屢思彈鋏爲居停所留詠此代東

和沈朗山寒夜排悶詩

和沈朗山宜園感舊絕句

朗山悼忘姬詩情辭悽惻憶拙荆于前年棄世作此寫懷亦以歌當哭也

朗山辦滇點軍務奉旨賞強都巴圖魯字清語謂其聰明肯任事好漢也旋補

授雲南鹽道作此以頌之

壽迤東道蔡芥舟並賀新加奇車伯巴圖魯之喜

白 鶴 軒 集

賀沈朗山進鹽道署新任之喜

和沈朗山卽事感懷詩四首

中秋夜雨演亂人民離散故詩中及之

同治癸酉年八月初四日自昆垣進京司道各官出郊餞別是日潯行時鹽道

沈意文贈扇題詩余酬以所養雙鶴依韻和二首

甲戌二月出京龔叔雨世兄贈扇題詩余依韻奉酬

壽宋引恬方伯七十

壽鹽道沈朗山

琴竟圖

和蔡芥舟贈別詩四首

續和前韻四首

宋小墅前輩依韻和四章再次韻奉酬

壽蔡小霞年伯

關中遇雨

關中交卷甚遲作此以示多士

張桐廬先生之孫小名福壽英華露爽如虎豹之駒雖未成文已有食牛之氣
五歲開蒙余名之曰堂傑作詩以勉之

張堂傑開蒙甫周月屢來署向余背誦三字經聰穎出羣作此以爲前程之券
與迤東道蔡芥舟話別詩五首

松鶴圖

奏疏

奏爲廣東噴夷滋擾情形。恭摺奏聞。仰祈聖鑒事。竊噴夷自道光十一年犯順以來。最爲猖獗。其莫可如何者。惟廣東一省。緣屬東民僑聚。習見噴夷伎倆。且各國夷人貿易。俱以廣東爲最便。噴夷賈不通。各夷人必從中撓止。故道光二十九年。噴夷欲申入。卒不敢逞。如果督臣撫馭有方。則可永保無事。臣現接廣東省城及香港來信云。九月廿三日。噴夷貨艙內有賊三名。官兵購線。俟至內河。連水手漢人共十二名。一併拏獲。噴夷因制軍不早爲通知。極爲不平。投文七次。向制軍索人。制軍不收其文書。旋將所拏十二名。送回該夷處。該夷說此人內有假的。要制軍見面。分辨是非。制軍置之不理。亦未知爲防備。該夷水師提督於二十五日。乘戰船三隻。突入內河。將獵德。龜江。及鳳凰岡。東安。西固。海珠砲臺。盡行占據。豎立紅毛旗號。二十七日。各街派丁巡緝。被噴夷鎗斃二命。因此人心忿怒。欲放火盡燒十三行。制軍飭

白鶴軒集

令禁止。二十九日。夷兵在城外放炮。轟入靖海門內。砲火延燒舖戶數千間。三十日夷兵扒入外城。搶至制軍衙門後街。被壯勇殺退。十月初二日。攻破外城。將制軍衙門燒燬。制軍走入內城。著紳士伍崇曜蘇廷魁等出城向嘑夷領事講和。該夷仍連日放炮攻城。卹隻俱不能出入等語。臣竊惟通商外夷。統觀利弊。實有損無益。嘑夷在香港。人本無多。卽火輪船上舵工水手。皆係內地民人受僱服役。廣東連年滋事。著名土匪。聞拏躲避。盡以香港爲逋逃藪。我兵不敢往彼搜捕。此次制軍派兵到嘑夷拏賊。因未通知。致該夷有所藉口。如一面嚴飭沿江兵弁。防守砲臺。亦不致變起倉卒。爲今日計。江湖各省。尙未安靜。且寧波上海港口。均已通商。豈可再開邊隙。惟夷情叵測。德所不能化者。卽當以威懾之。彼勾匪藏奸。肆入內地。傷兵勇。焚砲臺。燬衙署。且煽惑人心。謂與官爭。不與民敵。欲恐嚇督臣。用賄行和。督臣必彈壓百姓。俯首聽從。彼遂爲所欲爲。技止此耳。臣接廣東信云。嘑夷實無能爲。卽攻破外城。

白 鶴 軒 集

亦不能守。惟各官畏之如虎。現南海縣大瀝九十六鄉紳董。練勇萬餘名。自備糧械。聲言於十月中旬與暎夷決勝負。虎門砲臺。派兵防守。暎夷戰船。不能駛入。受夷人傭雇者。亦十回八九。參將衛佐邦。同知林福盛。均已帶兵到省。自十月初十日以後。未知情形如何。惟人切同仇。則暎夷必當胆落。且各國夷人。因暎夷滋事。有防貿易。必從旁撓止。萬一暎夷悔過。再約和議。當明立章程。令從前洋行商人。洞悉夷情者。妥協辦理。斷不可失體損威。致餒民氣。如仍舊猖獗。卽當聲治其罪。彼舡堅炮利。長於水戰。乘其上岸。以我之百。攻彼之一。勢無不勝。伏乞皇上頒發諭旨。飭令廣東督撫。激勵士民。一二月內。必當將暎夷盡行殲滅。所謂一紙書賢於十萬師也。臣同鄉在京者。聞暎夷滋擾。其信皆自上海寄來。所言大略相同。謹據實直陳。伏乞皇上聖鑒。謹奏。

奏爲暎夷滋擾。督臣玩延貽誤。恭摺奏聞。仰祈聖鑒事。竊廣東暎夷於本年九月突入內河。肆行猖獗。督臣葉名琛。已將情形具奏。應和應戰。聖心

白

鶴

軒

集

自有權衡。臣現接廣東省城來信云。噶夷蓄意入城。籍端恐嚇。守城武弁。及江面戰艇。有請令交仗者。有請發給火藥者。制軍皆不准。益飭各砲臺不得開砲。火藥彈子。着卽繳回。噶夷乘我不備。在艇上放砲。外城房屋。各沿江艇隻。多半化爲灰燼。臣同鄉在京者。聞知此信。人人切齒。竊惟海疆地方。民夷雜處。易啓嫌隙。夷舶往來飄忽。到處窺覷。自虎門至珠江。多設砲臺。原爲防夷起見。廣東紳士。因噶夷滋事。於本年十月間。會集府學明倫堂。以固守力戰。互相勸勉。甚至耆老童孺。皆聲言如噶夷入城。吾輩均當爭先搶殺。該督臈封疆重寄。將近十年。於廣東民情。與噶夷伎倆。自當熟悉。如謂噶夷受挫於廣東。必雪憤於廈口上海等處。犬狼之性。不足與較。然此惟小嫌隙則可。若於該管地方。攻城池。焚房屋。而亦曰吾爲別省計。隱忍姑容。是舍近而圖其遠。使柔懦畏敵者。有所藉口。倘在別省亦如是。其將何以制之。噶夷自道光二十一年以來。妄自尊大。陵辱我民人。挾制我官長。此次占獵德砲臺。被鄉勇奪回。入

靖海城門。又被兵勇逐出。計殺死者不下數百名。香港土匪。伺夷兵內入。放火燒搶。失財物甚多。實已智窮力竭。彼砲能及遠。每藉此以張聲勢。然能傷人實少。彼虛張而吾復縱之。夷情罔極。其有厭乎。臣聞嗜利者。不能捐軀。違情者。不能使衆。該督之父老志說。迎養在署。與各官往來燕會。其因此得缺者。行路之人。皆能指數。候補府史樸等。奉委下鄉勸捐。乘隙尋訛。私肥囊橐。以故人心解體。一旦有變。挾眷先逃。棄外城不顧。派丁壯千餘。將輜重六百餘箱。搬進內城。嗾夷知該督在巡撫署借住。連日放炮轟擊。彈飛五裂。該督倉皇退縮。籌莫展。命紳士伍崇曜向夷目講和。日久未決。城內外被殺被燒各戶。轉徙流離。萬口痛罵。封疆大臣。如此舉動。安望其爲朝廷宣布威德。正不獨取笑外國已也。皇上明見萬里。臣桑梓之邦。訪聞甚確。謹據事直陳。茲抄錄廣東原信。恭呈 御覽。伏候宸斷施行。謹奏

其三

奏爲逆夷竄入省城。滇分路夾攻。以圖收復。恭摺仰祈聖鑒事。竊逆夷於本年十一月竄擾廣東省城。皇上命黃宗漢畢承昭驛馳前往。黃宗漢擬走蘇杭。意欲在上海廈門各口。探聽夷人消息。廣東江水。有東西北三道。西江自廣西梧州府失守。大兵現在肇慶府堵禦。賊匪不敢東竄。東江惠潮二府。黃宗漢自福建繞道。由此抵粵。計期尙在明年四月以後。北江自韶州府樂昌縣至清陽峽。極爲險要。清遠縣距省四百餘里。土匪出沒無常。官兵迭次剿捕。未能淨盡。一聞省城有事。多乘隙窺伺。伏乞皇上簡派一大臣。由兩湖馳驛。其路較近。湖南巡撫路秉章。係廣東人。探報夷情。必能得實。該大臣路過湖南省城。剿撫一切。可以面商。噉夷蓄意入城。屢被廣東民人攔阻。現各縣有團練公局。聞噉夷犯順。皆攘臂爭先。該大臣一入廣東境界。卽檄令州縣官。調選各鄉練勇。信賞必罰。激其忠義之氣。必有裹糧負戟以從者。軍聲既振。土匪必聞風解散。抑卽諭令畢承昭。由北江行走。相機勦辦。其東江用宸慈。聲勢更爲聯絡。至水師提督駐紮虎門。乃夷船來往必由

之路。猶當嚴密防堵。臣竊惟夷情叵測。撫慰之法。非能戰必不能和。況城內各官。均被挾制。語云。投鼠忌器。似未可攻之太急。惟夷人勒賄兵餉。所欲得者。省城對面河南地方。如苟且調停。允其所請。彼必建砲臺。設防兵。大都耦國。於省城實爲不利。此處民居稠密。溝隙尋仇。日後更無所底止。臣現接廣東省城十月廿二日來信云。夷夷破城後。猖獗尤甚。謹別紙抄錄。恭呈御覽。伏乞皇上聖鑒。謹奏。

其四

奏爲廣東江面。土匪聚掠。請旨嚴飭查辦。以靖地方。仰祈聖鑒事。竊維廣東水道有東江西北江三路。北江爲南北要衝。來往船隻尤多。奸徒探知虛實。每假充緝私差役。乘機搶掠。近年報劫累累。獲案者實少。自廣東省城至韶州府。路經三水清遠英德數縣城。江岸上或一里。或四五里。均有鄉村市鎮。盜賊卽鄉市中之無賴者。此輩三五成羣。離合聚散。沿江居

白

鶴

軒

集

民。必能知其踪跡。應請旨敕下廣東督撫。嚴飭州縣官。於沿江各鄉村市鎮。擇公正伸者。人所信服者。舉充鄉長市長。使之就近稽察。毋得以具文塞責。江邊小艇。並居民舖戶。有爲賊接運及窩頓銷贓情事。准其鳴官究治。道府於州縣官耳目尤近。被劫之案。州縣勘驗。五日內報道府。道府勒限訪拏。并按月將首要各犯。有無弋獲。申詳督撫。如扶同隱飭。別經發覺。均從重參處。江上下游要隘。明立界址。使千把總等武職。酌帶兵役。分段扼守。偷巡緝勤勉。半年之久。並無失盜。或失盜而限內能拏獲。分別紀功超擢。民間強壯者。以時團練。各衛其鄉里。間有不虞。訐其幫同緝捕。以濟兵力之不足。至於東西二江。亦照此辦理。要之法非人不行。民所以玩法者。實由地方官之不能奉法。今欲整頓廢弛。是在封疆之臣。通飭各道府。嚴立章程。以所屬之安否。定有司之功過。州縣官以戢暴安良爲己責。毋畏難苟安。毋藉端擾累。並於離江較遠之處。編聯牌甲。一體查緝。則奸細無所藏匿。江面庶可肅清矣。臣愚昧之見。是否有當。伏乞皇上聖鑒。謹奏

其五

奏爲外省例設書胥謄寫詞狀應嚴行查禁以杜弊端而伸冤抑。恭摺。仰祈聖鑒事。查例載內外刑名衙門。務擇誠實識書者考取代書。凡有呈狀。令其照本人情詞。據實謄寫。呈後登記代書姓名。該衙門驗明收受。其有教唆增減者。照例治罪。推原例意。爲不能自作呈詞者言耳。現外省代書。非由考取。官履任後。必私送規禮。方准充當。民間控案。先將情事向代書稱述。卽能自作呈者。亦必向代書索藍格紙謄寫。蓋戳登記姓名。方爲合式。違者官不收受。代書因此漁利。廉察之官。多不根究。貪鄙者即借之爲耳目。如所告案情重大。牽涉賤私。官有處分者。則設計消彌。用言恐嚇。必不肯交出呈紙。代爲謄寫。其尋常案件。原告被告。以財行賂。則增減情節。顛倒是非。鄉氓何知。任彼欺弄。名爲代寫呈詞。實則把持訟事。刑吏書吏。有經承。有貽寫。貽寫與代書。名目相似。然所寫乃文稿。非替人寫呈狀也。至提督府

都察院所收京控各案。其呈多係白紙。並無一定式樣。如應奏請申理者。摘叙原委。具摺將原呈一併陳奏。候旨施行。是白呈尙可達於皇上之前。豈不可入地方官之手。如謂不設代書。聽民間自行謄寫。恐其被人挑唆。砌詞傾陷。查唆使誣控。例禁綦嚴。正當懲一儆百。惟未經審訊。情之虛實。代書何從預知。且即情虛。亦非代書駁斥。如謂有代書則刁徒不能託告官長。藉端挾制。然使實係地方官審斷不公。或差役有索詐擾害情事。豈可禁人控告。是代書之設。便於官而不便於民。其弊不可勝言也。臣籍隸廣東。聞廣東凡告狀者。其藍格紙均由官發。給代書謄寫蓋戳。并代爲投遞。州縣衙門。用錢四五千文。督撫等衙門。用洋銀三四十元。凡掛號出票行文等費。均由代書承管。臣竊維在官吏役。省一人則去一弊。代書係內外刑名例所應有。惟京中刑部及五城司坊。并未循例考取。而外省則控案皆經其手。即教唆增減。有治罪之律。然破案者實少。應請旨通飭各省審理刑名衙門。務當隨案稽查。如代書有迴護官府。播弄鄉愚。及包攬訛索等弊。該管官不行察報。

別經發覺。卽照徇庇例交部議處。抑或敕部將舊例刪。除內外一體遵行之處。恭候欽定。此等書吏。知法犯法。防不勝防。如地方官開門放告。隨告隨收。隨收隨辦。則有實不如無也。臣援引例文。指陳弊竇。爲宣達下情起見。伏乞皇上聖鑒。謹奏

其六

奏爲畿疆業已肅清。從前被賊裹脅難民。來京生理者。懇恩免究。仰祈聖鑒事。竊自賊匪滋事以來。有被裹不出而甘心從賊者。亦有被裹不甘從不賊而不能者。至於被裹之後。卽乘間逃回。不得以從賊論也。近聞步軍統領衙門。拏獲被賊裹脅人。有供在高唐州被裹牧馬割草一月有餘。始行逃回之案。有供在舒城鎮被裹煮飯挑水三四日。卽行逃回之案。京城爲輦轂重地。盤詰奸宄。最爲要緊。惟被裹者實係良民。卽當分別省釋。因思前年賊匪由山西竄入直隸。民之隨裹隨逃者。不知凡幾。其曾經殺人者。罪在不

白 鶴 軒 集

赦。若爲賦裹脅。驅使圍禁。一旦脫虎口而倖生。核其情節。實可矜憐。現直隸撤防後。商農均安其業。各州縣未能查辦此等案件。而獨於其來京。拏解治罪。是地方業已肅清。而民之擾累。仍未有窮期也。伏讀咸豐三年六月初八日諭旨。如有先被賊誘。自投來歸。免其治罪等語。仰見皇上蕩滌舊染。與斯民以更新之至意。即如收復揚州臨清州及高唐州。屢經統兵大臣等救出難民。訊明釋放。奏奉諭旨。在案。今因來京傭工。拏訊治罪。同一被脅。內外辦理。未能畫一。亦非皇上如天之仁所肯出也。現楚皖地方被脅者。更不能以數計。如於蕩平後。一一訊明治罪。風聲所布。賊益得藉辭以煽惑吾民。民竟不能不隱忍以從賊。去年五六月間。侍郎王茂蔭奏脅從人犯。請從緩定擬。御史薛鳴皋奏形迹可疑人犯。請從寬審辦。彼時係巡防吃緊之時。而又皆當時拏獲者。自不能稍爲寬縱。致奸匪漏迹京城。迄今事隔日久。被裹來歸者。各圖生業。豈可追其既往。况此等人犯到案後。或翻或認。并無確實証據。倘原拏之弁。哄誘教供。承審之官。用刑誣服。更不可問也。

臣竊維爲今日計。治民必先治官。賊匪經過處所。地方官多以出城防禦爲名。藉詞逃避。民之被害者。特逃避之不及耳。現各省督撫於收復城地後。專摺具奏。州縣官尙准以功過相抵。是官員失守城池。事後收復。尙有免罪之條。豈愚民被賊裹脅。自行逃回。不在從寬之例。應請旨飭下步軍統領衙門。順天府五城拏獲被脅人犯。訊係奸細之徒。來京布散謠言。探聽消息。或帶有賊物。或結有黨類。供証確鑿者。解交刑部從重治罪。若係從前被賊裹脅。現來京工作之人。取具的實舖保。准其釋放。如無舖保。卽遞回原籍。似亦矜全難民之一道也。臣愚昧之見。是否有當。伏乞皇上聖鑒謹奏。

其七

奏爲督撫參劾屬員。應據實陳奏。從嚴懲辦。以儆貪墨。肅官箴。恭摺。仰祈聖鑒事。竊維今日吏治廢壞。由捐納出身者。逢人迎合。由科甲授職者。

亦遇事干求。捧檄甫出。卽揣視肥瘠。較量遷移。轉於國家設官爲民之意。漠不相關。官不愛民。民不畏官。盜賊蜂起。實由於此。自古弭盜之術。不過曰安之勝之。勝之在擇將材。安之則在選良吏。大兵所過。戶口流離。得良吏以善其後。若解倒懸。厥功尤倍。不獨被害之區。宜卽蘇民困。卽安堵之所。亦當體恤下情。皇上以澄叙之權寄之督撫。各州縣距省遠近不一。督撫履任後。州縣官不能遠離職守。來省晉謁。賢否未能盡知。道府於所屬有表率之責。且耳目尤近。倘於因公接見時。觀其趨向。察其材能。不復詳閱文案。暗訪輿論。則州縣官之勤惰貪廉。皆可以得其實。現今審斷辭訟。州縣有權。而道府無權。翻控之案。道府多不肯提究。且有欲提究而州縣官抗不遵者。推原其故。皆因道府收受苞苴。事事被其挾制。甚至已經發覺。且代爲掩護。此等積習。非督撫破除情面。併如參處。不足以懲頑頑卽如閩浙總督王懿德。奏請將福建漳州府知府金崇勒休一案。實因金崇需索陋規。每因所屬未能餽送。卽行遇事挑剔。是公事之准駁。一視餽送之有無。執法營

私。莫此爲甚。查律載監臨官挾制求索所部內財物。計贓論罪。乃該督原參摺內。第云聲名平常耳。第云年力就衰難期振作耳。所參不實不盡。此金崇所以肆意咆哮。嘵嘵置辯也。又如欽差大臣載齡等。奏請將四川建昌道俞文詔革職一案。實因俞文詔在首府任內。把持公事。各官奔走其門。則其鑽營賄囑。朋比爲奸者。必不止一人一事。查俞文詔係由捐納出身。器小易盈。非善於要結上司。不敢大張聲勢。該大臣等奏請將俞文詔罷斥。於朋比賄囑各情。未能根究。早在聖明洞鑒之中。臣竊維有治人。乃有治法。而行法必先自上始。今欲隨時整頓。豈必盡人而誅之。督撫風旨。衆所嚮方。惟明示賞罰。則不可用之人。皆將有所轉移。而樂爲我用。大吏守正。而後秉正者來。大吏無私。而後營私者退。其有怙終婪贖。是自取愆。尤不可恕也。現各省有盜賊地方。各以官之貪橫爲口實。治賊者法無可貸。尙有擬加重之條。治官者罪坐所由。豈可從惟輕之議。應請旨敕下各省督撫。於所屬詳慎旌別。如有貪跡贓欺。即當據實嚴參。按律懲治。不得僅以革職勒休了

事。庶被參者可以闢其口。不敢藉詞挾制。未參者亦可以懾其心。必將勉爲循良。從此吏治民風。蒸蒸日上矣。臣愚昧之見。是否有當。伏乞皇上聖鑒。謹奏

其八

奏爲海運司員保舉過優比例遞陳仰祈聖鑒事。本年七月廿七日。內閣奉上諭端華全慶奏江浙海運正漕事竣。請府出力各員分別獎勵一摺。戶部員外郎成琦王友端。均着賞戴花翎等因。欽此。臣初讀諭旨。竊謂我皇上慎重倉儲。恩施逾格。該二員實屬非常出力。故酬庸之典。聖心自有權衡。及閱邸抄。始知該王大臣等原奏。卽以花翎請保。臣竊以爲過矣。查花翎一項。本所以待軍功。近年以來。疊奉上諭捐資助餉。卽與効力行間無異。是以捐輸鉅萬之員。皆得以花翎請獎。實雖由於捐餉。功仍歸於軍需。若海運一事。實與尋常隨帶辦事並無區別。且所行道路。不過二百餘里。所經時日。不過

三四箇月。戶部尙有帶貼銀。每員二百四十兩。抵津後均係地方官供給。並非自出己資。驗看米色。襄辦文案。卽稍有勞績。蒙恩得以儘先升補。獎叙已不爲不優。乃竟請到花翎。殊覺駭人觀聽。道光二十六年。海運伊始。草創經營。一切章程。均無例案。彼時隨帶司員。未嘗有花翎之保。今則悉照舊章。奉行成法。其難易固判然矣。上年江浙兩省海運漕米。多至一百五十萬石。經費後到。籌墊維艱。彼時隨帶之員外郎。皆止以郎中卽升。今則米數僅及一半。經費到後。無須籌墊。其難易又判然矣。上年浙江巡撫黃宗漢力排衆議。獨任海運之事。無畫不遺餘力。始蒙賞戴花翎。孫瑞珍慶祺兩次驗收海運。皆能迅速。始蒙賞戴花翎。今該司員隨同辦理。速則分任其功。誤則不任其咎。其難易又判然矣。卽此比較。已覺輕重懸殊。且其原摺於戶部郎中易文溶。則請以鑒缺知府用。於吏部員外郎賀壽慈。則請加知府銜。於副參領明堯。則請以參領卽升。於委筆帖式喀格。則請以筆帖式卽補。循階請獎。均有等差。獨至該二員。破格聲請。又不能指出所以應請花

白 鶴 軒 集

翎之故。但稱成琦本係即升郎中。王友端在本部亦應升郎中。無可再保。豈實任郎中有可保。候升郎中。轉無可保耶。戶部員外郎。在本署應升郎中。吏部員外郎在本署獨不應升郎中耶。副參領非本應升參領之員。委筆帖式非應補筆帖式之員耶。顯係今年京察屆期。該二員因差使尙好。一等可以操券。道府本所自有。故別出新意。於不可必得之異數。乘隙要求。如果出此居心。尙復何堪設想。伏查上年河南守城出力案內。奉有所保過濫。姑念力捍危城。勉從所請之諭旨。江西守城出力案內。奉有保舉過優。交吏兵二部核議具奏之諭旨。仰見皇上詳審軍功。不容冒濫之意。若如該二員所請。是其功直過於軍營出力也。上年二月。慕陵奉安禮成。降調給事中賈世行。其時郎係工部郎中承辦已及三年。奉旨以應升之缺升用。未聞有郎中無可再保之說。若如該二員所請。是其勞直過於山陵大興也。方今海洋平靜。海運之舉。明年在所必行。偷戶部司員。從此夤緣隨帶。名利兼收。一經保奏。優獎即可幸得。是功輕賞重。將何以處江浙各省催漕雇船重洋遠涉

之委員乎。且將來軍務告藏。大兵凱撤。又何以處巡防經年出力勞績尤著之司員乎。悉心比較。實屬無一而可。臣愚竊太喻該王大臣等保奏及此。究將何所比附也。相應請旨。可否將該二員花翎撤銷。或卽照此案內。賀壽慈之例。給予升銜。或分別各以應升之缺升用之處。伏候宸斷施行。並請飭下該部。嗣後辦理海運人員。不得概請遇缺卽補。亦不得越級請升。庶奔競之風。可以漸息。而趨避之功。可以預防。臣爲核實名器起見。謹比例瀝陳。伏乞皇上聖鑒。謹奏

其九

奏爲各州縣考試文童受財枉法請旨嚴禁。以肅吏治。恭摺仰祈聖鑒事。竊維廉恥之源。開之自上。端士習。厚民風。實由于此。歲科試爲士子進身之始。例由州縣官憑文甄別。錄名送府。知府再加考試。所以振興文教。遴選眞才。法甚善也。現今地方官于簿書錢穀外。未常留意人才。且並不識教民

白

鶴

軒

集

爲何事。如能于童子試擇品學優長者置之前列。使多士知其所觀感。是亦教民之一道也。臣聞廣東省各州縣所取文章批首。多繫以財行求。臣籍隸瓊州。如瓊州府所屬十三州縣。自道光元年後。惟瓊山縣批首。榜發後人無異言。其餘各州縣未考之先。批首已講定。多則洋銀七八百元。少則四五百元不等。陋習相沿。道府于屬員。並不以此爲執法事。嚴行禁止。惟道光二十七年前任雷瓊道黃宗漢。傳各批首到署面試。小示懲罰。然未將批首斥革。亦未將州縣官參究。學政所得棚規程儀。由各州縣攤派。于批首之卷。皆瞻徇情面。全行取錄。使賣者買者。有所恃而不恐。甚至自第一名至第十名。非用洋銀數十員。亦不能得。士習卑鄙。日趨日下。皆由州縣官不知廉恥。以考試爲奇貨。勢使然也。以親民之官。于掄材大典。衆人咸屬耳目。尙敢舞法。則其平日審斷案件。又安望其能廉。且儋州童生多至三千餘名。文昌縣童生二千餘名。每因考試不公。點名時將買批首者指斥。不使與考。並有毆官毀署情事。州縣官自知理屈。不敢稟報道府。偷激成事變。必以開

考爲名。登之奏牘。則查辦更非易易。現瓊州土匪滋起。古人云得一良令。如得勝兵三千。是必爲守兼優。官與民乃聯爲一體。應請旨敕下廣東督撫。嚴飭該道府。嗣後州縣考試文章。如敢仍蹈故轍。賄賈批首。立即指名嚴參。按枉法律。與受同科。計賍論罪。雖有貪吏。必不敢以身當法。廉恥之源。即教化之本。其于士習民風。所益非淺鮮也。臣桑梓之邦。多年積弊。今據實以陳。伏乞皇上聖鑒謹奏

圍攻莫大櫟

欽惟天朝大一統。豈容裂土以與人。而草野効愚忠。但知殺賊而報國。我大清撫有區夏。二百餘年。列祖列宗。以聖繼聖。舉凡食毛踐土。久浹帝德而洽皇仁。卽在化外徼荒。亦戴天高而履地厚。四海澄鏡。萬國梯航。距中國數萬里外西南諸夷。亦莫不候月占風。輸誠効順。乃獨有英吉利者。其主忽女而忽男。其人若禽而若獸。兇殘甚于虎狼。貪黷之心不殊蛇豕。恒蠹食

白

鶴

軒

集

夫南夷。輒夜郎以自大。乾隆嘉慶間。英夷叩關納款。請舟山。兩聖人洞燭其奸。嚴行斥絕。然自此勾串粵省奸商。私往澳洋島上。盛販鴉片。毒我生靈。傷民命。奚止數百萬衆。耗民財。豈僅數千萬金。並敢屢殺唐人。匿不交兇抵命。萬衆痛心疾首。蓋數十年于茲。而英伎之窺伺天朝。其所由來者漸矣。道光十八年。我大皇帝察知英夷之橫。鴉片之毒。急欲培養國脉。護惜黎元。因黃鴻臚名傳莖之所奏。而遂如所請。特命公正廉明之林尙書名則徐頒給欽差大臣關防。來粵查辦。收蕞煙而停市易。清支流而絕來源。猛以濟寬。法中寓德。英夷不知悔罪。竟爾肆逆稱兵。黃閣主和戎之議。自撤藩籬。烏雲多蔽日之奸。甘爲謬醜。以致三年以來。逆夷恃其船堅炮利。由粵入閩。歷浙入江。據我土地。殘我文武。淫我婦女。掠我貴財。致使四省生民。慘罹鋒鏑。九重宵旰。備歷焦勞。蓋暴其罪狀。罄竹難窮。洗我煩冤。傾海莫盡。實神人所共憤。覆轍所不容。邇者江南諸當事。亦用粵東故智。甘爲城下之盟。竭百萬氓庶之脂膏。保一二庸臣之軀命。誠有如金大理名國鈞之所

奏者。夫英逆不過荒外一島夷耳。其來動勞數萬里。其衆不滿數萬人。我天朝席全盛之勢。滅此跋扈之魔。何啻長風掃籬。何疆臣大帥。惜命如山。文吏武夫。畏犬如虎。不顧國仇民怨。遽行割地輸金。有更甚于南宋奸佞之所爲者。此誠不解也。嘗歷觀其奏牘。英夷本無能也。而張大其強橫。兆民本奮勇也。而反謂之渙散。無非脅我君主以必和之勢。而得幸逃其欺君悞國之愆。試觀金大理奏牘所稱藉敵要挾一語。眞字字嚴于斧鉞矣。士民等伏讀明詔。萬無可奈何之中。不得不勉允所請。又有朕以重任付諸臣。諸臣無罪。還朕一欺字之旨。仰見聖天子英明聖武。燭諸臣之無能。念士民之忠憤。暫爲羈縻于目前。而亟圖振發于事後。將示天下不測之神威也。夫逆夷性等犬羊。貪得無厭。和之眞僞。不問可知。試觀上年英逆寇粵。自據四方炮台。遂爾肆行姦掠。若非北路各鄉社義士。殺其兵頭。殲其鬼卒。勢必毫無忌憚。破城焚劫。以大快其兇貪。何肯以區區六百萬金錢。卽時解圍退去。所可惜者。困魚入釜。抽薪來五馬之官。放虎還山。曳兵奪萬民之氣。一

白

鶴

軒

集

日縱敵。數省禍延。輿言及此。真可爲傷心痛哭者也。且上年和約之時。原議退出龍穴。還我虎門。香港亦是暫留。兵端從此永息。詎知曾未踰時。而前盟頓背。二虎炮台。木龍橫踞。五羊門戶。鍊牝誰關。于今三年。莫能收復。其謫詐于嶺表。更遑問于江南。唯我大皇帝手握金鏡。胸秉玉衡。循以大事小之義。而曲順于天。防非族逼處之嫌。而密爲之備。恭繹絲綸。昭如日月。當事者謂逆饑方收。甘作怡堂之燕雀。設復禍機猝發。徒爲人肆之豚魚。律以負國之誅。一死奚能塞責。流芳百世。遺臭萬年。青史所傳。所爭若在幾微之頃。當事者念此景運。世受生成。讀書者圖報國恩。擊壤者敢忘帝力。早矢忠以勵節。願敵懷以同仇。茲聞英夷將入珠海。創立烏頭。不惟華夷未可雜居。人禽不堪并處。直是開門揖盜。啓戶進狼。況其向在海外。尙多內奸。今乃逼近榻前。益增心患。竊恐非常事變。誠有不可以言盡者。若他國羣起效尤。更將何以策應。是則英逆不平。誠爲百姓之大害。國家之大憂。惟不共戴此天。方無愧乎血氣。如甘同履斯土。是真全無心肝。茲者恭

白 鶴 軒 集

讀上諭。士民中果有謀勇出衆之材。激于義奮。團練自衛。或助官軍以復城邑。扼要隘以遏賊鋒。或焚擊夷船。挫斬大慝。或申明大義。開啓愚頑。能建不世之殊勳。定膺非常之懋賞等因欽此。民等欽奉王言。恭行團練。仿軌里連鄉之制。指顧得百萬之師。按嘗田捐餉之方。到處有三時之樂。無事則各歸農業。有事則協力從戎。踴躍同胞。子弟悉成勁旅。婉孌如玉。婦女亦解談兵。嗟乎。昔日從容坐鎮。誰令寇在門庭。祇今慷慨指揮。誓看波恬滄海。庶幾金湯鞏固。紓聖主南顧之憂。鯨鯢殲除。雪薄海普天之憤。結同仇以明大節。鑑此丹忱。伸天討而快人心。賴此義舉。天神共鑒。莫負初心。奏爲恭謝天恩事。五月十九日內閣奉上諭。雲南糧儲道員缺。著韓錦雲補授欽此。竊臣瓊南下士。荷國家生成之德。咸豐八年。由戶科給事中。補授四川通省鹽茶道。九年兼署按察司篆務。十一年加鹽運使銜。感異數之頻膺。悚涓埃之未報。茲當起復來京。渥被恩綸。補授今職。伏思雲南地處邊陲。漢回交爭。蔓延今日。糧儲道兼管民屯事務。必驅園肅清。則惟正之

白 鶴 軒 集

供。乃有所出。現由川入滇。道路梗塞。急宜設法疏通。籌餉徵兵。皆職分內應辦之事。惟良莠不齊。撫之未能盡釋其疑。勦之又難盡殲其類。如臣樗味。深恐未悉機宜。惟有勉力馳驅。隨事認真。以期仰答高厚鴻慈於萬一。所有微臣感激下忱。理合繕摺。叩謝天恩。伏乞皇太后。皇上聖鑒。謹奏。

奏爲叩謝天恩仰祈聖鑒事。本年四月十三日。准護理督臣宋延春札開。現欽奉上諭。護理雲貴總督。所遺臬司篆務。奏明委臣兼署。並代辦雲南布政司衙門日行事件。當於十五日將雲南按察使司印信移交前來。臣遵即恭設香案。望闕叩頭祇領任事。竊念臣粵東下士。知識庸愚。由庶吉士散館改授部曹。洊升科道。咸豐十一年。在四川鹽茶道兼署臬司任內。以捐修川省城濬。蒙恩加鹽運使銜。涓埃未報。寢食難安。嗣因聞計。回籍守制。服闋進京。同治四年。復蒙恩補授雲南糧儲道。履任後。權司出納。時以曠職爲虞。茲復兼署臬篆。伏思滇省漢夷雜處。地廣隘多。現軍務未竣。防緝固當周密。民情凋敝。寬猛尤須得宜。如臣樗味。深恐弗克勝任。惟有

勉竭愚誠。力求整頓。凡三逆籌辦勦撫一切事宜。隨時稟商督撫臣。妥爲贊畫。斷不敢因暫時署理。稍涉因循。以期仰答高厚鴻慈於萬一。所有微臣感悚下忱。謹繕摺叩謝天恩伏乞皇太后。皇上聖鑒。謹奏

同治六年四月十六日

記

重陽度昭化天雄關記

古之登高者。若王建望鄉。杜老登臺諸作。不必盡在大山喬嶽也。要惟所履者高。則所見愈遠。余自庚子通籍後。計二十餘重九。並未登高。咸豐戊午夏入蜀。上天雄關。紀程錄有遙望四山。雲氣盡出其下之語。今者于役滇南。再經葭萌。宿雨初霽。天色開朗。僕夫告余曰。是登高時也。余趁曉促駕。訪費散侯屯兵處。在指在山麓。或指在山巔。乃循石階而上。盤旋曲折十五里至牛嶺山。累石爲門。鐫天雄關三字。陷者填之。缺者補之。平夷處

白

鶴

軒

集

長廣約百數十丈。闕帝廟。觀音閣。踴聖爛然。山僧不俗。亦解迎客。壁間碑字。受風雨久。不可辨識。楹帖以崇實如此。雲山天不少。古來冠蓋幾人間。一聯爲最。山之下。白水嘉陵二江欲去仍留。環繞如帶。其西北則龍安陪丈。儼若列屏。東望秦塞諸山。千層萬疊。有俯伏者。有環侍者。有疾趨者。自有天地以來。安排恰好。又十里至新鋪。荒店數椽。四面皆山。螺髻虎牙。詭狀百出。五里過九龍溝。巨石撐空。如萬笏朝參。令人起敬。南望摩雲寺。在峯尖最高處。竹樹蒼翠。常有煙雲繚繞。以去大路遠。人跡罕至。余作賦無才。宜遊至此。可謂胸盪雲海。眼空宇宙矣。惟雪泥前跡。已隔八年。笑問山靈。曾識我否。晚次劍門。驛飲茶萸酒。遂援筆而爲之記。

三溪社學記

吾鄉社學創始於附生黃用可。翰林院待詔謝友竹。數十村勉襄義舉。捐資墾墮。不約而同。將建祠。衆議供奉文昌帝君。使人知憑依在德。不敢褻慢。

寄書來滇。屬余題額。余喜復之曰。諸君子振興文教。培植人材。此盛德事也。三合溪來源甚遠。居斯土者。山環水抱。據一方之勝。請名爲三溪社學可乎。衆曰。地以人傳。乞記其事。以示永久。余竊維古者黨有庠。術有序。其人相習。故其教易行。如周禮鄉三物。所謂知仁禮樂。皆勸學事也。所謂友嫺任卹。皆睦鄰事也。今使一鄉之中。父詔兄勉。隨材質高下。立爲科條。師友得其薰陶。身心有所檢束。雖中材亦不至爲非。今使一鄉之中。共敦古處。毋以強凌弱。毋以衆暴寡。相友相助。相卹相嫺。則仁讓且達乎閭巷。且人情趨避。每聽命於鬼神。因果報應。雖涉於怪。理實不誣。如世俗所傳帝君陰騭文。勉以奉行。示以功過。其言尤顯而易入。義學之設。敬神勸學睦鄰。蓋一舉而三善備焉。至各村捐款。或置產。或分掌。收息以供香火。其餘爲獎賞賓興之費。每逢祭期嚴肅整齊。於人心風俗不爲無補。夫三溪異流。併歸於海。合之而遂成巨浸。吾輩往來治者。設學以教之。繩以法實繫以情。情猶水也。豈不能如此溪之合而愈大乎。余一官無狀。不能爲閭里

榮。異日解組歸田。三溪之上。乃童時釣游處。入是學。登是堂。猶願與鄉人士。談經講藝。仰觀教化之成也。

序

四川己未恩科武鄉試題名錄後序

皇上御極之初。特開恩榜。迄今已閱數年。茲以來歲庚申。爲二旬萬壽慶辰。奉詔於本年行恩科鄉試。嘉惠士林。有加無已。臣韓錦雲任四川通省鹽茶道。派充文闈提調官。揭曉後。隨同署督臣宗室有鳳接辦武鄉試事。集衆以選尤。張侯以示的。將取中武生六十二名內外場技藝合式者。謹繕試錄進呈御覽。臣例得綴言簡末。竊維武鄉試之設。始自前明。兼用弓馬策畧。直省由巡按史考試。兩京歸兵部選取。景泰天順間。倏罷倏復。國初定鼎以來。尤重騎射。列聖整飭戎行。靡不臨軒校閱。武科則三歲大比。馬步箭外。又試以弓刀石。弓必引滿。刀必舞花。石必及椿。至挑入內場默寫

武經。復彌封姓名。比較單雙。好審定甲乙。其棄取視明代爲尤詳。二百餘年歷科所拔擢其材。可以膺專閫偏裨者。尤不乏人。欣逢皇上壽宇延洪。中外臣庶。凡懷材負藝者。莫不軒髮鼓舞。群起以赴功名。益都雄踞西陲。連并絡之精。抗岷峨之秀。所謂江漢炳靈。世載其英者。萃於文亦鍾於武。我朝名將。若岳鍾琪。楊遇春。皆蜀產也。士苟有志。未必古人不相及。臣襄校之餘。矢公矢慎。所望於蜀人士。非僅一日之科名已也。自古豪傑。每應運而興。有非常之材。必有非常之遇。旱麓之詠作人則曰豈弟。械模之詠作人則曰壽考。是人材之振作。本於德。亦本於壽。論者謂有文王之德。故其造就之也速。有文王之壽。故其涵養之也深。此鬼置所以美糾桓。騶虞所以樂官倫也。諸武舉叨沐隆恩。列膺揚之選。益當感激圖報。庶幾今日之壯士。即異日之將材。千城腹心。無慚知遇。臣謹拜手慶言。爲聖天子壽考作人之頌。實不勝忻欣忭舞於獲承斯役也已。四川通省鹽茶道臣韓錦雲稽首謹序。

雲南武鄉試錄後序

同治辛未歲二月初。激江府城收復。雲南撫臣岑毓英凱撤回省。迺照上年武鄉試改期奏。案庚午科帶補戊午己未兩科併於本年二月舉行。以巨韓錦雲任雲南糧儲道充武闈提調官。臣隨同校閱。將三巾額合式者繕成試錄。恭呈御覽。例得臆言簡末。竊維國家文科之設。勤兵備儲將材。程之以矢石。試之以韜鈴。而實勉之以忠孝。必以禮義之勇。潛消其暴戾。斯名實乃相副焉。雲南自咸豐乙卯後。回匪蠢動。武鄉試停止十有五年。臣於同治乙丑冬履任時。劫饑方張。總辦巡防局事務。數年來親見昆垣解圍。及被陷城池克復。得本地將士之力爲多。其各鄉團練。雖以自衛。亦聽徵調。且有裹糧負戟。不辭千百里之遠者。則信亦敵愾同仇。雖邊徼不乏忠義之士。今欣逢大比。越桓輩出。咸奮功名。異日膺專閫。備千城。當思報君恩於萬一。抑臣更有望者。鷹揚之舉。可以收羅豪傑。勇且知方。則回邪之氣自戢。天理永昌。迺迤西屏蔽。逆黨負隅。尙未肅清。皇上明見萬里。南顧之憂。時飭

疆臣繪輿圖以進。官斯土者。念守在四夷之義。簡賢能。飭戎伍。肅紀綱。明賞罰。安攘良策。不外據乎此。臣敬謹臺事。非僅爲諸武舉一日之科名。蓋欲爲滇疆上太平之頌也。二品頂戴雲南糧儲道臣韓錦雲謹序。

昌述村翻刊族譜序

文昌縣之東昌述村。岡阜屈蟠。抱虎枕其北。銅鼓峙其東。川原滋潤。樹林深鬱。吾族祖朝林。自明天順時。披榛艾棘。卜居於此。得山川之助。遂能保世以滋大。朝林生昌蘭。蘭生玘。至玘生五子。長儉舉人。次儼。三俊進士。任河南按察司副使。四倫歲貢生。五价廩生。四百餘年來。五支戶口益蕃。衣冠彌盛。未有遠棄其鄉者。其分居鳳鳴。昌陽。昌愛。昌圖。昌璧等村。相去僅數里。均能力保家風。相友相卹。非明德後。能如是哉。余憶少時鄉先輩。每言昌述乃韓丙間後。丙間任長沙府知事。歿於官。有符姓者載丙間子南旋。私匿之。少子名仁政。卽朝林之父也。余詢諸族耆老。皆曰是言傳已久。其軼事婦孺能道。緣昌述立派。與宗圖未合。苟從仁政後遞推。衍雖百世可

白 鶴 軒 集

知也。自乾隆初年附生日章纂大宗譜。妄相援引。昭穆遂紊。嗟呼。葛藟之詠。謂他人昆。苟有人心者。斷不出此。余又聞嘉慶時。廩生庸彝至昌述村。謂各兄弟曰。仁政少孤。自有明至今。相傳係丙間後。果爾。是與吾同出七世祖瑤翁公。且係宗子。古人有鬼謀之說。爾等至仁政公之坟前禱祝。吾手持杯环自空擲下。以十次皆俯爲決。子孫環而跪者。眼見自一次至九次。皆如所祝。無不泣下。僅餘一次。庸彝遂巡不復擲。噫。前人之心。卽後人之心也。前人之失其祖父。與後人之失其祖父。其心之不安。亦一也。同治壬戌。余自蜀歸。修瑤翁祖祠落成之日。族長老聚而言曰。仁政一支迷失已久。流俗傳聞。豈盡無據。彼願來歸若何。余曰。禮不云乎。收族然後宗廟享。譬諸人有二子。一左右就養。一離羈轉徙。爲父母者。必然食咽不下也。癸亥夏。奉主登座。先期語昌述各邨兄弟。主廟前齋祝致告。皆色喜如久客還家。侍奉庭闈。依戀猶切。孫子之心安。則祖宗之心無不安。又大可知也。惟舊譜輩次舛謬。亟宜翻刊。已歿者旁加小註。存者則改之。衆謂譜序之作。非余

莫悉。乃述其世系。並詳其迷復之由。斯譜既成。感幽冥。勸孝義。異日者修闔族譜。持以爲質可也。甲子上元臘月族人錦雲謹序。

林環溪先生八旬晉四壽序

有虞氏尙齒。夏殷周踵而行之。漢魏以後。講經端闕。則先問高年。迴鑒舊都。乃宴衍故老。賜之粟布。授以幾杖。所以美教化。敦風俗。載在史冊。傳爲美談。唐開元時。版授侍老八十以上上縣令。九十以上上州司馬。百歲以上上州刺史。引年加秩實始於此。國初定鼎以來。每逢慶典。必令地方官存問耆耄。其鄉會試年屆八旬以上未中武者。有司循例題奏。交部核議。或授舉人。或授翰林院國子監等職。嘉惠士林。尤爲亘古所未有。咸豐辛酉科吾邑林環溪先生以歲貢應省鄉試。奉旨欽賜舉人。賀而祝者日在門。同治癸亥先生八旬晉四。其孫子將戲綵上壽。以余爲先生素悉。屬爲嘏辭。余不才記游泮日。先生已食廩餼于庠。旋以明經薦太學。兩試京兆。註選銓部。奉檄分教高雷二府。並署遂溪縣訓導。所至皆稱職。余一官浮沈數歷中外。

白鶴軒集

二十餘年。愧無建白。邇來大江南北。烽火頻驚。解組南歸。歲月虛擲。屈指同學少年。半就零落。而先生皓首窮經。賢書榮貴。再數年又當上春官。入承明。可不謂清時之人端也乎。生平無奇袤之好。蔬食布衣。事事必留遺地。非惜財力。乃惜福也。太翁增生諱華。歿之日。先生赴省試聞訃。藹足二千里。晝夜兼程。不半月到家。期年內油葷不入口。其謀窳也。涉水登山。備嘗艱苦。卒得吉地。弟增生之墳棄世。有子五人。完婚娶如己出。并拮据以償宿負。司鐸高州。貧識多名下士。有生員因命案株累。移文懇縣保釋。其或不守臥碑。並未遽加詳革。必勸諭再三他改悔而後已。稽叔夜之言曰。善養生者。清虛寡欲。先生去泰去奢。不以滋味煎其肺腑。有合於養生之旨。荀子之言曰。美意延年。先生孝友性成。又扶獎人才。體恤寒士。有合於延年之道。是先生之享壽天年。在理不在數也。覽揆之辰。邑紳里老。觴詠淋漓。余執筆徘徊。譬諸枯筵之扣洪鐘。村謳之侑儼筆。先生據案讀之必喜而笑曰。是夫也。識我在三十載以前。而祝我乃在三十載以後也。

欽加運同銜署瓊州府海防同知知瓊山縣事
加三級培生金老父臺大人五旬大慶榮壽序

蓋聞山號寶林。列晴峯於壽宇。江名浣浦。酌流水於壽卮。范仲淹築清白之堂。心情如見。熊子復爲循良之吏。民困頻蘇。勝地鍾靈。量涵淵嶽。名賢在望。念切儀型。所由布雅化於雁塔龍堆。絃歌滿邑。祝遐齡於鶴松鳩杖。士庶躋堂也。恭維培生老父臺大人。越水名家。仁山苗裔。慧心天悟。秀質冰清。文簡屏中。對巧蛛於鸚鵡。徐陵句內。辨刈稻於瑯琊。采芹而名噪膠庠。年剛弱冠。負笈而身遊吳越。師盡名儒。秋試棘闈。氣雄文陣。七絃未上。蔡中郎曾悵桐焦。五色難迷。蘇學士終逢李薦。重邀青眼。遂換藍袍。碣石探幽。一轡殘照。燕臺懷古。幾卷新詩。迨以未登第英髦。充咸安宮教習。經談槐市。只覺生風。派出天潢。亦來立雪。瓜期適屆。三年循鹿洞之規。杏苑頻開。萬里赴鵬程之候。名馨淡墨。帖艷泥金。高詠霓裳。欲向蓬山待漏。

白 鶴 軒 集

遠飛鳬舄。遽來花縣鳴琴。對人鏡之芙蓉。羣空雲北。懸郎官之星宿。光照嶺南。初蒞始康。繼臨乳水。晏元獻迭興書院。晉火費增。子太叔整飭官方。荏苒盜獲。舉行保甲。激勵同庚。二載經營。十奇歌詠。宜乎繫羅衡之馬。肅肅郊圻。攀劉龍之車。勞勞士女也。既移棠蔭。遂蒞瓊臺。飛滄海之帆。花明島嶼。過伏波之廟。葉密枕櫛。時也。蛙怒虎門。鴻敷羊石。羽書馳驛。水族跳梁。修築礮臺。遠市而氣消蜃蛤。勞來猛士。同裳而隊結熊羆。加以旱魃虐民。甫田耕石。修郡城則以工代賑。法效蘇聶。禱國社則稱雨爲元。語符趙相。至於宮牆數仞。郡縣同修。泉布千緡。功程浩大。邑人有議加賦。此事亦疑可行。但年穀不登。正供猶缺。若加騷擾。何以久安。五百金慷慨傾囊。因爲首倡。千萬戶殷勤集腋。各以心從。破壁風飛。選佛場階誰除草。虛堂露滴。操觚士筆詎生花。帑發二千金。鳩工居廈。材翹十二國。鵠立春臺。此則張弛合宜。而神形勞瘁者也。今夫才遺方叔。譏及歐陽。策棄劉蕡。愆增李邵。我父臺搜羅俊秀。振拔單寒。自分校秋闈。中雋者人傳

衣鉢。迄登蓬縣試。入穀者網結珊瑚。揮兔穎而有聲。一簾月白。聽鼃更而不寢。四壁燈紅。手披絕妙之詞。如逢佳士。座擊賞音之節。若度新腔。此尤心鑑懸堂而口碑載道也。紛紛海寇。事有株連。訊鞫訟庭。能無草率。不媚人以枉法。在危地而求生。是以實惡旁流。超遷顯職。循聲遠播。預兆高年。茲者會值添籌。艾宜服政。蘭敷廣廈。歡顏而身被萬間。桂發中秋。佳節而期過七日。釐延壽國。光耀壽星。蠱神木之千頭。陶公眉秀。獻瑞之於五指。黎母髮低。化洽桑鳩。方恐恭之去。符迎銅虎。咸思叔度之來。則東郡仁風。不又爲南溟化雨哉。

傳

李母楊太宜人傳

咸豐戊午夏。余任四川鹽茶道。扁試錦江書院。肄業諸生。新繁李固字貞甫。名下士也。余得其文。如蘇東坡乘扁舟夜泊石鐘山下。聞水相搏作噌吰鏗

稽聲。不禁拍案叫絕。是年鄉試。余充提調事。揭曉。貞甫中高第。修弟子禮來見。求教尤切。余勛以遠大。公餘與之論文講藝。並未詢及其家事。辛酉夏。余奉先繼慈諱歸里。貞甫亦於是年腊月丁其母誥封宜人楊太宜人艱。蜀越相去萬里。不得見者且五年。今春余調選銓部。貞甫赴禮部試。援例授主事供職。秋曹相見於都門寓舍。袖李西樞太史所撰楊太宜人墓誌銘。稽首再拜。爲余言曰。門生少失怙。不能自立。賴母氏延師至家課讀。稍長就外傳。惟以慎交游。保門戶爲兢兢。門生原名固。得第後。改名祝慈。欲效古人祝嘏之義。爲母氏延春暉答劬勞耳。今者終鮮之痛。良不可忍。西樞先生所作誌銘。已約諸壙。願夫子擇其大者爲傳。備異日彤管之採。則存歿均感矣。余嘉其志。引而進之曰。太宜人懿行如誌所云。爲婦爲母時。事雖瑣屑。皆有條理。至若好施無吝。凡族黨之鰥寡及不能婚葬者。知之必周之。可不謂仁乎。於人家節孝。婦加意矜全。可不謂義乎。仁義之人。其量十世。得之巾幗則尤難也。且古之遯母訓成大名者。首推廬陵歐陽永叔。

永叔之父觀任錦州推官。其母鄭氏生永叔於錦州官署。實蜀人也。永叔少孤。鄭氏教以讀書。並以觀之治獄者告之曰。是死罪也。務求其生。求其生而不得。則死者與我皆無憾。今吾子居永叔。非生長之邦。又官比鄰爲刑名總漕。禮云蒞官不敬非孝。凡用法須得法外意。毋刻覈深文。毋鍛鍊周內。義也而以仁行之。是卽爲喜道令名。所以慰慈懷於地下者。不在此乎。夫國家授職。必勝其官。儒者命名。無忘其本。體此以事親。孝之大者也。貞甫聞而喜曰。夫子所言。非獨可揚閭範。亦且可作官箴。生不敏不敢受教。余遂叙之以爲傳以告後人。

同治乙丑夏五月通家侍生韓錦雲撰

頌

署文昌縣劉望三德政頌

並序

劉望三邑侯。甘肅階州人。咸豐己未進士。以知縣籤發廣東。辛酉冬月履文

白

鶴

軒

集

昌縣署任。進紳耆於庭。首訪民俗利弊。次第更舉。敦士習。愛人才。鋤豪暴。恤孤癯。去煩苛。振淹滯。訟獄至。隨手解結。吏胥不能爲人重輕。因事下鄉。減驕從。駐逆旅。所至不擾。道旁望顏色者。皆曰吾輩毋失慈父母也。爲政一年。四郊樂業。雞犬不驚。風雨時若。歲乃大稔。邑人歸美於侯。飲食必祝。欲道揚德政。垂示方來。以余曾膺外任。屬爲嚮引。余叨樞蔭。雖不文。其曷敢辭。敬拜手爲之頌曰。

侯自武都。來治文昌。兒童竹馬。懽迓路旁。懽迓之情。急於星火。鸞鳳思君。鷓鴣化我。牛刀鷄割。言戲宣尼。新硎初試。代庖能治。苗黍膏之。臺萊樂只。政僅一年。才非百里。泉以廉飲。琴以和鳴。草生圓扇。花滿訟庭。三面頻聞。五辭兼聽。明允公孚。若衡若鏡。簪顏別白。噓氣生春。何情不達。無抑不伸。明獎善良。隱安反側。鞭朴不施。人皆屏息。呈規差費。谿壑難填。革除一切。清風灑然。訊釋繫俘。覆盆日照。積案平反。二天再造。公餘講藝。爲牧兼師。陶以德行。澤以詩書。肩試生童。評量甲乙。最拔前



白 鶴 軒 集

茅。棄華去實。旱魃爲祟。露冕度社。省刑減膳。盈缶應時。兇黠掃盟。含沙射毒。購線擒渠。群從懾伏。昔時邑人。平地生波。今依棠茂。腹詠心歌。昔時邑人。畏吏如虎。今罷追呼。福庇安堵。令下流水。惠奉仁風。活我蘇我。惟侯之功。寒極迎暄。飢久得食。衣我絺我。惟侯之力。商懽於市。農樂於田。懷恩服教。仰日戴天。桐縣思朱。泉人戀蔡。祈佛留賢。及瓜毋代。何以報之。甘雨隨東。何以畀之。庭有懸魚。我作頌辭。非阿所好。輿論僉同。口碑載道。上仁下義。負曝獻芹。廉吏可爲。敬告後人。

贊

崖州營游戎唐泰清像贊

陰符之謀。非徒步伐。攻心爲上。不戰而屈。惟君果毅。幹練知方。巡哨所至。一而能當。起自行間。韜鈴熟悉。宣武珠璣。口碑載德。鋤暴爲義。安良爲仁。桓桓如虎。先聲奪人。憶我識君。戊午之夏。我往四川。君來日下。萍

蹤偶聚。傾蓋談兵。請纓磨盾。議論縱橫。志決身殲。于今六載。人事滄桑。丹青未改。我披遺像。敬撰弁言。精悍之氣。凜如生前。

陳清如先生聰穎好學少游先大夫席儒公之
門素加推許小試屢列前茅年逾而立方入
泮以一衿終其子鐘山抱遺像屬題敬撰
七古長歌以弁其首

人生在世如逆旅。蒼蒼老子東道主。升沈枯苑不由人。其行若使止若尼。先生讀書胆氣豪。藐如拾芥視青紫。方期驥展遂鸞雲。豈料鵬搏竟鰈羽。浮海自傷道不行。萬里驚濤同尺咫。歸來重整舊時裝。拂劍雄心猶未已。踏登名場四十年。一領青衿老無補。束修取給能幾何。口授村童三四五。遺愁時讀捲堂文。老屋荒涼聲徹戶。有火難然烈士灰。此恨茫茫成終古。我披遺像思

舊遊。神光彷彿溢豪格。當年絳帳授經時。在三大節師兼父。維聲一飛上
天。颺附東風好擡舉。古來窮達如轉轂。儒冠豈必身多誤。先生有子能象
賢。聲雋一登驚儕伍。不在其身。在後人。九原應喜聞此語。

李萬年先生性倜儻遇事必盡言排人之難濟
人之急建祖祠創賓興造橋梁皆出貲爲之
貿易在舖前余造訪輒欸留信宿清談至夜
分不倦咸豐辛酉冬余自蜀歸先生前一月
捐館余以不及見爲恨其子發茂抱遺像乞

題余贊曰

我別先生。計廿年久。今我歸來。先生烏有。迴憶曩時。殷勤握手。下榻必
先。倒屣恐後。剪燭之言。尙記八九。西州重過。半曇迴首。室邇人遠。清風

不又。丹青遺照。哲嗣能守。我撰弁辭。庶幾不朽。

潘子善餘習計然術循循若儒者所居距余家
十餘里時相過從癸亥冬余赴京謁選送余
於瓊之海口以其母吳太孺人玉照屬題余
維母有隱德善餘左右侍奉甚得母心爰製
數言以彰彤管

子能孝。母之教。子能賢。母之仁。支持門戶彤影單。撫此藐孤良獨難。坤道
含宏道乃光。百年保爾春暉長。我表女宗式鄉邦。於戲後嗣篤不忘。

盧迪甫像贊

有酒且飲。有書且讀。自得於己。何所不樂。無求於人。何所不足。誼篤鶴
鵠。爭化蠻觸。在鄉恂恂。歸真返樸。德進耄年。不愧不怍。憶我識公。始自

舛角。嗣爲浮名。東西南北。我今日歸。公猶矍鑠。喬嶽丰裁。瞻望起肅。克家有子。騰聲震學。抱公喜容。弁言見屬。其和若春。其溫如玉。惟天佑眷。延齡介福。余忝世講。工歌史祝。父執之前。再薰三沐。

銘

韓碧湖暨郭安人合葬墓志銘

道光癸卯春。余治裝北上時。族叔碧湖先生在海口欸留數日。溯行送余上船。勗以遠大。此後時通音問。至咸豐辛酉。予自四川奉諱回籍。先生已歸道山。其鋪夥經理舊業猶有存者。又二年其孫翰豐持狀踵予門稽首請曰。祖父母力行善事。翰幼不及知。謹就鄉里所傳述者節錄一二。願賜之志銘。以光泉壤。余讀之悽然。不能執筆。蓋不勝今昔存亡之感也。公諱福翼。字萬甫。碧湖其號也。軀幹魁梧。一望知爲長者。少聰穎。家貧未能讀書。歷練久。於事理上是非臧否。了了胸次。年甫壯。習計然術。時物徵貴徵

賤。揣測不爽。黎嗣蟄鄉。憊遷所至。分布井井然。不以心計傷其渾厚。久廼益振。治家嚴肅。所有不自私。建祠廟。葺墳塋。立祭產。修譜牒。皆獨力爲之。每謂賓興可以勸學。乃出厚貲生息。訓蒙脩脯。考試卷資。皆取給焉。又廣置義田。歲收所入以贍鰥寡之不能婚娶者。授室後。力能貿易。則資以生計。自是君之族無失所者。鄰里以緩急告。雖至再三。無德色。尤敬愛儒士。懷才未遇者。輒振其乏。與人交不矜才露氣。託以事必盡其力。至於排解難紛。取片言立定。遇親故旅困。棲托無所。亟引薦之。配郭氏。性慈惠。賑發恤孤。存活甚衆。事姑以孝聞。姑老眼矇。誤跌碗碟俱碎。急扶起。姑曰不知碎幾多碟碗矣。應曰並未損失。惟姑跌地受驚耳。弟婦有稍忤者。當時不之校。異日則曰汝昨日所爲所語宜乎。內外莫不歎服。勤紡織。蓄數百金。分爨時一一交出曰。吾不以私財遺後人也。公行一。兄弟七人。卒年七十四。子二。長衡準早逝。次文桂由監生議叙八品銜。孫三人。衡生翰豐。桂生翥豐翺豐。氏年六十四。用形家言合葬於所居湖塘村之西。

銘曰。九疇先富。曰爲善資。哲人遠識。乃大其施。財毋苟得。利不爲私。賜配助之。德叶坤儀。佳城鬱鬱。桑梓是依。同室同穴。湖塘東西。子孫聚族。掃祭以時。維手有澤。維口有碑。千秋萬載。視此銘辭。

賦

石鼓賦

以舊聞石鼓今見之爲韻

考軼事於周宣。搜遺書於史籀。有石鼓之穹隆。列宮牆之美富。體變蚪蝌。蹟鑄蛟守。一鈎一股。碧樹枝交。若斷若連。嘉禾穎秀。二千餘年風雨。僅爲小雅之遺。四百六十風凰。尙識岐陽之舊。當其威伸獫狁。氣戢淮瀆。會同有繹。衣德紹聞。大蒐講武。輿特成羣。聽鼓聲而思驍將。銘獵碣以示鴻勳。彷彿龜皮之製。欹斜鳥迹之文。爲想作歌。應是當年吉甫。如從開字。何須後代揚雲。惜乎。零落山阿。蒼涼碣石。有司已失其傳。太史不登諸策。世遠年經。原拋野擲。牧童敲火。落日翻紅。村杵春梁。炊煙蕩碧。遨遊遨遊。模

糊礪角之痕也。豈丞丞缺裂斷斂之畫。至有唐之元和。獲遺文而珍惜。韓公好古。悵拊撫之已遲。蘇子從官。尋偏旁而偶得。物果通神。人知愛古。棄野者得收。斷白者終聚。裏席包甌。填金拂土。登薦辟雍。輝煌殿宇。幸脫詩書之劫。垢不污素。如含絲石之聲。壁方啓魯。篇刪孔叟。文未蝕於夏鼎。商彝。本揭張生。寶更甚於魯壺。薛鼓。則當檢復齋之碑錄。編遺跋於石林。篆別蔡邕之體。訓參潘勗之音。日惟丙申。莫詳年代。序分甲乙。幾歷升沈。胡爲乎濡紙脫文。韋蘇州先開異議。細書淺刻。歐陽子自用師心。鄭漁仲旁綴斤權。遂謂先秦勒石。馬薺堂別求傳記。因稱白水從禽。悵古人之不作。留聚訟以至今。豈知文異漢秦。蹟經岐汴。擬鸞鳳之翥翔。陋京都之研鍊。金繩鐵索。字已差訛。吉日車攻。辭原互見。苔昏薛濫。撫阿定有鬼神。瑩蓮甌承。攝取未驚雷電。所以圭璋特達。黃山谷莫罄形容。楮墨輕虛。李東陽彌深眷戀。方今藝林廣布。聖藻彰施。釋菜徵大昕之鼓。采芹展在泮之詩。煥掌故於周京。錄披金石。辨癰胝於史筆。寶重由彝。劍快斂橫。下啓冰斯

之篆。辭嚴義密。上齊的礪之碑。彼俗書之嫵媚。又烏以方之。

哭孫肇元文

同治二年。癸亥歲。八月初三日。余孫肇元染癘疾夭逝。傷心刺骨。爲文以哭之。其詞曰。嗚呼肇元而竟止於是耶。吾年將六十。抱孫惟汝一人。何生之難。而死之易耶。汝以道光乙酉。五月初九日。生於燕京魏染胡同官寓。時爾父母纔二十歲。爾父感於神仙之說。誤服金丹。於是年十一月棄世。余哭之。有爾。命短實余福薄之語。豈知十五年後。哭汝更甚於哭汝父耶。汝少岐嶷。余愛之。晨夕有抱。咸豐癸丑春。賊黨竄擾天津。爾祖母携眷屬由運河歸里。余至通州船上不忍別。瀕行。復抱汝上岸。囑曰。我在京。爾異日來省我。爾即應曰。兒長大自能來。余謂是子殊敏慧。由今思之。此孝順之語。出於五歲孩兒之口。乃大不幸也。戊午歲。余升授四川鹽茶道。有自家鄉來者。俱云汝安靜。無佻儇習。惟路遠不能來。辛酉余丁艱回籍。汝迎余

於海口。余問你需何物。可往買。汝不對。蓋不敢也。汝嗜書。余檢汝父手蹟。命汝收攝。可年學易。授以來氏易註。並製聯句以勗之曰。伏案毋忘師教訓。授經須念祖恩勤。汝尙領悟。余管督汝嚴。冀汝成立。爲門戶計耳。汝相貌似非短拆者。今年夏月屢得頭暈疾。周身出汗。延醫診視。俱云無礙。服藥不甚效。星家云。白虎人命宮。又冲太歲。祭之則吉。余謂修短有數。非齋醮可免。果爾。雖傾家以贖。弗吝也。噫。尙何言哉。願況晚年喪子。作詩哀苦。其時聞之。泣懇冥司。願再生況家。今汝母茹苦矢節。喪汝煢煢無依。余哭汝更甚於哭汝父時。惟汝幼無知。冥司或不許汝見。吾聞夜臺有紫衣侍御追攝亡魂引到芙蓉城。汝速將汝意央其轉達。倘憐汝無罪而殤。再生余家。余當建旃檀道場爲輪迴衆生作大功德。若不允所請。閻浮乃極樂國。無上菩提常誦般若經超度一切。汝厭棄塵世。已得大解脫。驂鸞駕鶴。乘化而遊。余不能強以所不安矣。嗚呼。孤雛降割。天道難知。遲暮之手。豈甚良司。命家童多燒楮幣。以致吾情。中秋前二日祖父紫東拭淚書。

信

文淵先生大人閣下。孫兒肇元。性質畧佳。承閣下多年教訓。視之如父。一旦溘先朝露。辜恩負德。恨何可言。弟自揣薄德。殃及孤雛。萬念俱灰。憂心如搗。製註同一篇。謹抄錄呈覽。遲數日後。尙祈枉驚荒齋。藉抒煩悶。專此奉佈。即請近安。統希澄照不備。愚弟韓錦雲頓

白 鶴 軒 集

信

六二

丙寅五月十九夜夢中得詩云冠裳采色唐虞
盛草木恩暉日月長醒後記去年放糧道即
是日也一官瓜及萬里蓬飄吉夢爲何因用
其詞及其意作七律一首

旅館燈昏午枕涼。夢中得句費猜詳。冠裳采色唐虞盛。草木恩暉日月長。綴
絡都非眞面目。榮枯卽是小滄桑。前程龜策難憑準。我尙飄零在蜀鄉。

夢詩徑欲問詩魔。愁煞天邊尙枕戈。日月其餘人事改。唐虞不再劫灰多。冠
裳誤我奔牛馬。草木疑兵雜鶴鵝。采色恩暉今若此。一場春已惜東坡。

彭子嘉由南書房京察一等轉補御史升授雲
南鹽道前途阻梗淹留川夔所植蘭一朶九
出馥郁異常余赴糧道任同處逆旅作此以

破岑寂丙寅五月二十日

捧檄馳驅日未遑。益州星聚喜分光。一雙如意承恩寵。敘城寓室以賜雙如意額
九瓣奇花兆吉祥。蓬島清華君獨占。戎城銀苦我同嘗。此行共勉匡時力。預
卜滇疆有棟梁。

鶴

高樓何處問簪邊。韋節度故城還蹟尙存簪邊樓不可攷

千戰重開翰墨筵。長日聞香凝室久。清時

軒

得氣讓花先。人誇並蒂瓊珠美。我愛同心臭昧聯。合寫瑞蘭圖一幅。品題催
索玉堂仙。

集

鹽糧道署在滇省城內彭子嘉不樂赴任以當

事者皆武人也作此以促其行

瑣碎鹽糧實要需。民生國計費踟躇。羨君寬海流通遠。愧我量沙制用虛。却
敵漫誇軍有一。論才每笑將無餘。洱蒼千里妖氛熾。好仗天威儘掃除。

不分回漢地天寬。蝸角何勞戰觸蠻。烽火驚心民望切。旌旗變色將才難。儒冠豈合圖溫飽。諫草曾經策治安。余任御史會上平粵東策願向滇池洗兵甲。共登祚席大團樂。

彭子嘉苦病思歸見於詞色作此以慰之

戎馬倉黃我獨賢。知君胸次自蕭然。士寒待庇千間厦。人溺思登大願船。且莫有田誓江水。相期勿藥即神仙。醫心敬把丹方授。闔處鐘聲靜處泉。

丁卯上巳宋小墅前輩招往龍潭修禊同遊者二十三人分韻賦詩看核具陳笙歌迭奏比右軍蘭亭實爲過之余拈韻得集字

鍵戶坐衙齋。如蟲未啓蟄。今朝出城來。遊眼恣取給。時雨潤麥苗。青青徧原隰。廉訪今郊祈。訂交盟車笠。臺館仰先型。詠觴耽結習。修禊古招提。白

詩

駒繞維繫。清泉繞寺門。石徑攬衣入。杯盤互唱酬。笙歌兼雅什。潭底有臥龍。聞之當起立。演疆本樂土。士民安井邑。邇來驚烽火。嗽鴻誰撫輯。茲遊無雜賓。各軫匡時急。宦海共舟筏。罅漏勤補葺。忙裏暫抽身。良辰懷靡及。三員在何處。瑤草不可拾。山靈應識我。臨去敬長揖。擬當掃邊塵。再約名流集。

和李銘珊刺史龍潭修楔

原韻

春潭水暖近仙宮。襖飲招邀舊雨同。龍隱未騰千尺霧。官寒尙有一琴風。難拋勝境來塵外。暫悔名場避熱中。逸少蘭亭無此樂。牡丹淺碧杜鵑紅。

丁卯重九馬培之協戎招飲席上讀宋小墅前

輩賞菊詩次韻奉和

列坐都忘大小年。金樽檀板樂僊僊。主因賞菊催佳句。客爲題糕集盛筵。晚節屢經風雨後。淡懷時愛竹松邊。登高脚力吾猶健。笑對霜枝傲更妍。

丁卯重陽偕寮佐登五華山時迤西軍務未息

各賦詩寫懷仍用宋小墅賞菊

原韻

軍務勞勞積歲年。暫時休沐集群仙。孟嘉乘興風吹帽。杜老澆愁酒盈筵。昆
海波濤秋雨後。榆城烽火暮雲邊。黃花不管人飄泊。猶向重陽分外妍。
醉揮茱萸學少年。御風高處挾飛仙。關山金碧輝千里。賓主東南聚一筵。蓋
世才名誇作賦。匡時經濟重籌邊。紀遊曼倩荆徐筆。寫出秋光萬點妍。

周漱泉山長植梅二株於五華書院學牛堂前并

紀以詩此梅乃龍泉寺道人所贈時昆垣戒

嚴余辦防勦事務草草致和工拙不計也

山長詩才似湧泉。仙枝移向曄經筵。竹松老去宜爲友。風月閒來不用錢。久
愛名花無俗韻。相期多士出塵緣。占魁端仗栽培力。立雪庭前淑氣妍。

詩

五

滇海飄蓬是夙因。干戈叢裡敢抽身。疆分夷漢情難懌。家近羅浮夢未眞。宦味淡時才愈歛。仙心修到物皆春。昆華何日銷殘劫。羞對携鋤月下人。

和沈朗山海心亭公醺詩

二首

海心樓閣挾飛仙。賓主東南啓盛筵。劫火幸逃清淨地。禪關不礙色空天。胸羅兵甲眞無敵。腹有詩書自果然。舊是冠裳遊醺處。高歌應繼李青蓮。

西南半壁好屏風。封豕長蛇一掃空。幕府借才推國士。邊樓籌策仗諸公。欣看勇練旋歸樂。難得官民笑語同。慙向樽前稱老大。信天翁是白頭翁。

戊辰封篆日作

衙鼓鼕鼕開後堂。書差三五不成行。宦遊自笑官傳舍。官禮先看印入箱。紅紙封條標日月。黃綾包袱拜君王。家人叩賀求頒賞。稍給青蚨即散塲。

和沈朗山贈余封篆詩

胥吏偷閒羅午衙。一官冷淡似唐花。虛銜久愧加三品。實政安能徧九華。裘

底詩餘堆作錦。牀頭金盞汰無沙。洱江湏仗迴瀾手。撐起西南百萬家。

沈朗山玉笙樓詩稿各體皆備人目爲詩狂作
此以戲之

健筆掀翻學海濤。元龍才氣壓羣豪。張顛杜癖今時少。博得詩狂眼自高。
一曲迷陽變楚聲。詠歸舍瑟尙鏗鏘。薄帷明月懷千古。誰識窮途老步兵。
三人皆以狂名

詩彙編年手自鈔。玉笙古調雜金鐃。狂名已散難收拾。莫效揚雲作解嘲。

沈朗山答余詩云邇來遇敵儂先怯咫尺軍中
有一韓余非敵也依韻奉酬

凱唱錢歌卽是詩。枯腸苦索太駸癡。沈朗性僻耽佳句。舞袖爭看白戰時。
笳鼓喧天奏玉笙。一聲變作萬千聲。拔山才氣凌雲筆。首效階蟲唧唧鳴。
讀書無術致君難。律例原情見肺肝。杜老尙遊嚴武幕。詩人何必不申韓。

詩

沈朗山贈紅頂一顆以詩報之

八

朝雲捧日出東躍。一點紅光照大千。慙愧扶輪才力薄。感君高誼載如天。
才思君如萬斛舟。兵符軍檄運奇謀。馬周自有封侯骨。火色飛騰出上頭。
蜀樹滇雲喜共陪。挑燈話舊好懷開。詩箋擬作瓊琚報。風味依然兩秀才。
昆海萍飄未有涯。一官笑我太支離。前身是否瑤池鶴。應向天家作羽儀。

沈朗山脊口在蜀無以爲家屢思彈鋏爲居停

所留詠此代東

途窮翻被鬼揶揄。千古才人類數奇。分金鮑叔交原少。脫穎毛生識已遲。
稔薄田陶令酒。萬間廣廈杜陵詩。靈均苦向蒼天問。天竟茫茫笑不知。
長身索米侏儒飽。造物無心聽所因。容易得官驚豎子。艱難竊位愧才人。
來出路情先怯。亂後還鄉意更親。我愛船山詩句好。不貪何用識金銀。

和沈朗山寒夜排悶詩

去住因人事不成。填胸奇氣尚崢嶸。淡交耐久松千尺。健語盤空鶴一聲。排悶幾回邀酒伴。送窮何處賣詩名。轅駒局促君同我。臥聽譙樓長短更。濱海飄蓬百不成。痛談時事氣崢嶸。廣收弟子遠官制。多削膏脂博政聲。白傳思歸全晚節。黃瓊應聘誤虛名。公餘願賦高軒過。已是冬殘歲又更。

和沈朗山宜園感舊絕句

香園老樹出垣牆。高枕華山引鳳凰。戎幕參謀機事密。紅塵飛不到蓮房。海天層疊眼光迷。金碧關山勢盡低。預約春來花事好。宜園携酒聽鶯啼。晝夜巡防約四鄰。驚心燃火厝餘薪。相期香雪齋前客。分散天花洗戰塵。

朗山悼亡姬詩情辭悱惻憶拙荆於前年棄世
作此寫懷亦以歌當哭也

詩

十

感人容易莫如詩。我讀君詩淚暗垂。君愛投懷傷墜玉。以殘胎死我思別遠泣
烹雉。雲遮梵率歸魂苦。路隔重泉入夢遲。空說營齋錢十萬。衰年匏繫尙天
涯。

郎山辦滇點軍務奉旨賞強都巴圖魯字清語
謂其聰明肯任事好漢也旋補授雲南鹽道
作此以頌之

傳來天語再緜清。文字章身此最榮。戎事馳驅忘況瘁。君恩稠疊重聰明。政
新難得調梅鼎。詩好還當奏玉笙。謂玉笙樓詩稿爲望高軒長過我。一官猶是老
書生。

壽迤東道蔡芥舟並賀新加奇車伯巴圖魯之
喜

簡練韜鈴將畧優。英姿颯爽迴無俦。潯陽觀政留遺愛。前署江西九江道滇微分
符仰大猷。廣種福田宜益壽。新加勇號比封侯。生申願效崧高祝。玉樹階前
迭唱酬。

徵江奏凱獎勳勞。壯士歸來競脫刀。鸞鳳天書煥綸綍。豺狼敵壘懾旌旄。箴
言贈我情尤摯。詩句驚人氣自豪。遙望羅浮家萬里。瓠南彩徹壽星高。

賀沈郎山進鹽道署新任之喜

排衙儀仗又新開。箋綵爛斑費剪裁。征筭多年非我有。調梅今日望君來。守
盆漢代頒官值。府海齊疆展霸才。預喜軍需能取給。商民兩便莫驚猜。
曾司鹽權到西川。調劑酸鹹衆口傳。裕國惟當持大體。好官豈必在多錢。嚴
查津要諸私絕。慎選賢能百弊捐。舊政爲君勤誦述。三迤井利費周全。

和郎山即事感懷詩

四首

河流衝決萬千家。無復污邪祝滿車。五六月水災民力久疲將潰散。軍需橫索

詩

又增加。扶危待賑年飢粟。解閤空思日鑄茶。眼看郊原禾黍盡。邊云得意即栽花。

蝸角交爭靜裡看。劉岑二院公餘緩步任蹢躅。爲耽秋詠娛佳日。肯愛冬烘附熱官。平闊江開鷗自在。晴空雲捲鶴高盤。百年懷抱何時展。留得松心耐歲寒。

空負才名是智囊。連營搜盡雁餘糧。夜來篝火頻爲祟。晝見庚星未斂芒。六七月間太白晝見虎穴幾時能子得。馬鈴終日聽耶當。懸軍縱賊兼焚掠。慚愧貂蟬荷寵光。

不談王道愧樵夫。曾識敦詩卻穀無。冷眼人應分皂白。熱腸我似醉醍醐。傳聞笳鼓心猶競。忍看沙蟲氣未蘇。爲問公門諸將吏。何年鐵網得珊瑚。文時

武官拜門大千例禁

中秋夜雨

滇亂人民靡散
故詩中及之

暮捲珠簾怯影單。萬家燈火少團圓。神仙有術掛雲易。烏鵲無依繞樹難。涼氣暗從雙袖入。秋光空付一琴彈。階蟲夜半添凄切。臥聽桐枝滴未殘。

同治癸酉年八月初四日自昆垣進京司道各
官出郊餞別是日瀕行時鹽道沈意文贈扇
題詩余酬以所養雙鶴依韻和一首

不拘形迹性情同。別後書煩繫鴈通。聯話茶香餘舌本。耽吟書味在胸中。三秋照我冰壺月。一曲懷人玉笛風。高舉祇將雙鶴贈。羽毛豐滿頂丹紅。

燕鴻蹤跡不相同。千里神交息息通。行路艱難兵燹外。掄才辛苦棘園中。曾經話別巴山雨。深愧吹噓國士風。我去君留殊切切。昆華時盼彩雲紅。

充鄉
試監試

甲戌二月出京翼叔雨世兄贈扇題詩余依韻奉酬

詩

聲教多年阻上都。滇疆急待濟時謨。本非異類情難格。更有同心道不孤。蟬
掃機槍雲路淨。氣銷兵火日光符。臨軒垂問瘡痍苦。六詔咸欽德化敷。同心司
謂諸句

宋小野泉司程用和余謝恩召
見皇上問及雲南民風軍務

一入龍門士不寒。師恩未報愧衰殘。妄思驥附馳名易。苦聽驪歌惜別難。
酒勸深林談最久。詩題便面喜相看。佳音尚有鱗鴻託。莫謂雲山路渺漫。

壽宋引恬方伯七十

江西人癸巳翰林

秀毓衣江迹尙留。凌雲西岸是嘉州。公生於四川
嘉定郡解家承簪笏淵源遠。府集圖書德
業優。赤捧名傳眞御史。碧幢任重古諸侯。壽辰喜報梅開早。醉折花枝作酒
籌。

名場眼看幾沈浮。駒隙催人易白頭。當代公卿多後輩。如君風雅足千秋。和
中有介徵神定。忙處能閒想政優。寡欲早眠天趣適。仙經底事訪丹邱。

南來奉檄入烏蒙。一綫螳螂路尙通。余由昭通
東川進省人愛庇寒開夏屋。我歡嘘煦有

白 鶴 軒 集

春風。疆圻兼攝能持勝。將士調和易教忠。隨隊幸邀擢舉力。鳳凰樓在五雲中。

花門狐火繞城圍。巡守多年未息肩。每念力疲情易潰。時防兵亂將無權。解圍四面須羣士。運策中樞仗大賢。荆棘剪除民望慰。惟從鎮靜得安全。

軍需告匱衆心離。輸粟捐金費護持。有口都能談戰守。空拳豈易起瘡痍。飄搖鴻雁難安宅。奔突豺狼未定期。漢將蕭何推第一。論功端望聖君知。

觴詠招邀竹院清。仙班到處即蓬瀛。才高難得鋒銳斂。詩好都隨咳唾成。雅集主賓休擇禮。淡交車笠已忘情。徐公風月無今古。莫厭常談是老生。

紫紅瓜瓠滿階前。家慶欣占得氣先。酒泛清壺名愛聖。詩投老衲語參禪。棲雲僧常投詩授餐適館憐寒士。種竹栽花學少年。好擬放翁團扇事。昆華留作畫圖傳。

臺館迴翔步後塵。南鴻爪跡雪泥新。空陳白簡憎多口。未挽狂瀾愧此身。舐鼎升天嫌大褻。攤書茹古願長貧。時艱計拙防賢路。祇恐雲山解笑人。

詩

一六

金碧關山却外身。一官匏繫亦前因。君遊東粵名猶在。我渡西江迹已陳。
書囊食餘通變化。木雞養到見精神。宦途聚散如萍梗。爲勸壺觴莫厭頻。
群仙畫下展雲旗。鳳簫鸞翔際會時。畫絹盡題金石字。吟箋競寫竹梅詩。
豫章材大翻風久。屏障山高疊錦奇。留得玉堂佳話在。恩榮重宴荷天慈。

壽鹽道沈朗山

滇徼聯鑣氣味親。西川迴首隔前塵。我如流寓歸無日。君亦頭顱半百人。
從軍慷慨賦南征。大鳥高飛試一鳴。磨盾才名驚上將。令人不敢薄書生。
阮籍猖狂米芾顛。元龍豪氣迴無前。驂駟得路半辛苦。記否鹽車上坂年。
羽檄爭馳堵百蠻。此鄉金碧是關山。才人酷有憐才念。何日能成廈萬間。

君試五華書院詩題
安能估廈千萬間

蘭菊紛披手自栽。肯教一日不花開。衙齋西角墻坳處。引得山光入座來。
金縷歌成索和難。笙樓倚月思無端。多情妙得清娛侍。紅袖添香耐夜寒。

翩翩舞袖愛吟詩。百鍊千錘一味癡。稿本編年成大集。相知異代未嫌遲。
三迤井養利群生。煎素熬波有政聲。此去好修鹽鐵論。莫貪著述讓勳名。
懸弧喜占小春先。松竹清高得氣偏。有酒自斟詩自祝。老來胸次更超然。
山海神仙事渺茫。金丹豈是養生方。贈君不用雨中物。十首新詩當壽觴。

琴覓圖

爲劉笏山太守題

劉君篋仕桐江邊。五馬群歌太守賢。政官西晉移演微。萬里從戎益慨然。
手携琴覓圖成峽。鉅公題跋如珠聯。自言先嚴惟愛琴。傳家即此抵青氈。先
慈茹覓充調飢。甘脆上奉姑嫜前。小子祿養痛不逮。摩挲豈獨在梧椿。我聞
此語增歎息。披圖三復意流連。方今六詔困兵甲。密子琴摧已絕絃。弱肉強
食恣豺虎。民有菜色饑無煙。兵如不戢將自焚。蒼洱何日洗腥羶。古來孝子
卽循吏。王事賢勞敢息肩。琴韻和平覓淡泊。爲政之理卽寄焉。嗚乎六一於
君是鄉人。隴岡碑表峙千年。傳聞龍神曾攝取。至孝眞能格上天。此圖寫意

白

聲聞外。翰墨通靈或有緣。世薄儒士多迂拙。相期戮力扶危顛。劉寬仁恕懸一蒲。劉寵廉潔選一錢。君家治譜史書編。琴在牀。莧在田。孤桐寸草心。情。先世清芬澤尙延。庶幾官箴庭訓兩無愆。

和蔡芥舟贈別詩

四首

鶴

官從去後定聲名。深愧退荒願識荆。薇竹軒前勤下榻。別君聊復話衷情。匹馬短衣萬里行。敢云到處有逢迎。昆華折柳情如訴。且聽風前玉笛聲。宦味何如書味濃。一簞原可抵千鐘。金丹脫盡煙塵氣。儂在遙遙海上峯。銷魂底事賦將離。祖逖先鞭好及時。連日階前聽鵲噪。預占得氣鳥先知。

軒

續和前韻

四首

集

敢道金甌早覆名。瀕行且住勝班荆。君恩愧乏涓埃報。肯爲萼鰲薄宦情。天高氣肅趁秋行。野草閒花一路迎。預約春來重握手。陽關莫唱第三聲。文莊忠介辦香濃。爭說珠崖間氣鐘。五指擎天攀附少。飛來海外是仙峯。

簡書一紙促分離。喜值昆滇洗甲時。吾輩升沉關氣數。人知未必勝天知。

宋小墅前輩依韻和四章再次韻奉酬

宦場辛苦博虛名。知足終須學衛荆。四十餘年前後輩。長安回首不勝情。
南來曾苦道難行。出郭煩君倒屣迎。今日官書催似火。又從茅店聽雞聲。
久宦年來昧不濃。階前脩竹笑龍鍾。此行穩渡瞿唐峽。看盡荆南十萬峰。
行囊蕭條苦別離。簪添鶴俸濟窮時。滇疆端賴匡扶力。佇盼綸音報我知。

小墅再用前韻賦詩四首老有退志作此以留之

臺鋪耆英享大名。滇疆萬里闢榛荆。袞衣莫作西歸想。應念邊民臥轍情。
防守多年禁夜行。星垣今日掃塵迎。頭銜特晉承恩寵。鶴振雲霄第一聲。
索句推敲雅興濃。當筵競勸酒千鍾。匡廬面目今猶昔。此是神仙最上峰。
秋草秋花送別離。我歸應及好春時。鴻來燕去分南北。一紙煩君寄舊知。

壽蔡小霞年伯

詩

詩

二十

孤南星彩耀中天。名士由來享大年。七種搜羅窺易象。一家著述有詩篇。
匡廬碑碣談名勝。煙水亭臺結淡綠。且喜萊衣能養志。侑觴多是玉堂仙。
琵琶聲斷大江潯。楓荻蕭蕭戰馬音。故里柴桑餘却火。君家桃李有新陰。
鍊丹懶學長生術。清白常存濟世心。今日躋堂同介祉。愧無佳句祝壬林。

聞中遇雨

已未恩科四川鄉試時充提調官

嚴肅堂前聚列星。天教時雨濯心靈。岷山自古鍾才俊。石室從今溯典型。
學尙本原斯近道。文歸雅正必宗經。霓裳不是爭豔調。應有仙人月下聽。

聞中交卷甚遲作此以示多士

恩榜宏開額又增。普天同慶祝岡陵。簷低屢滴催詩雨。漏盡猶挑起草燈。
調進清平原不易。篇傳急就更誰能。憐才願借長風力。送到蓬山上上層。

張桐廂先生之孫小名福壽英英露爽如虎豹
之駒雖未成文已有食牛之氣五歲開蒙余

名之曰堂傑作詩以勉之

屋後華山秀。階前玉樹樹。清河延令緒。元旦頒生辰。丁卯正月初日生。鼓篋師從善。升堂友輔仁。願將繩武意。爲爾誨諄諄。

宦味殊蕭索。童求意轉親。蛟龍得雲雨。鷹隼出風塵。福定偕三壽。才應敵萬人。嘉名余肇錫。珍重好書紳。

張堂傑開蒙甫周月屢來署向余背誦三字經
聰穎出羣作此以爲前程之券

吾愛張童子。登登步武隨。青年勤上學。白首愧爲師。鶯谷新聲調。鴻達好羽儀。荊州題品貴。佳士善揚眉。

祖武繩宜早。童心化莫遲。其餘言必慎。不足學方知。善務三人擇。功毋一簣虧。古來聖賢業。養正在初基。

椿紀年周甲。熊熊入夢遲。碧桃天上種。丹桂月中枝。視膳厓鳩祝。傳經重

燕語。清芬勸誦習。卽是好男兒。

四德蒼園備。同心望汝賢。擇鄰依學舍。持佛拜經筵。舐犢情殊劇。丸熊教更專。春暉何日報。勸誦白華篇。

雲路扶搖近。昆華著美名。傳家惟謹厚。識字況聰明。喬嶽松千尺。寥天鶴一聲。贈言期望切。應慰老夫情。

與迤東道蔡芥舟話別詩

五首

盡掃機槍出二關。榆城凱撤唱刀環。此行曾到蒼山頂。應有詩名勳百蠻。宦游君已廿年餘。兩袖清風意自如。我亦菜根頻咬斷。何曾彈缺笑無魚。共處衙齋若比隣。君留我去亦前因。宦場馳逐爭先步。如此相知有幾人。別君聊復往須臾。鄉誼交情兩不孤。薇竹軒前風月夜。挑燈爲我話豐湖。君家福澤自天開。十子羣誇繼起才。預祝今秋鳴鹿宴。桂花多折幾枝來。

松鶴圖

白 鶴 軒 集

白 鶴 軒 集

黃子畫松潑水墨。老幹輪囷霜露蝕。鶩鶩孤鶴遠飛來。枝高欲止止不得。同翔審視月明中。虬龍變化渺無極。低頭刷羽時孤拳。且借餘陰暫棲息。我家瓊島最高處。前身與汝舊相識。一官萬里謫滇南。披圖相見開胸臆。憶昔黃州恣游興。橫江夜掠東坡船。夢中化爲一道士。問而不答渺無緣。大呼仙鶴來吾前。子非凡鳥得氣先。游緜嶺。憩芝田。不飲不啄幾千年。蕭史簫王喬乘。世間豈尙有此人。爾不願乘軒食祿。時與衛懿相周旋。更不得梅花祇帳。自適其樂隨逋仙。胡爲乎丹頂鮮妍。衣則縞。裳則玄。具搏風之羽翼。長寄跡於盤根錯節之巖。件寥寥而獨立。勢矯矯以高騫。遠辭太液避幽僻。莫知其所由然。鶴廼引頸私告語。吾族飛潛宜遠慮。即今滿目煙塵昏。四顧茫茫究何處。況復鷺鳥相追飛。安用鸞翔與鳳翥。不然、雞群我立猶翩翹。清獻琴邊名已著。平生壯志本摩空。詎肯甘爲一枝據。囑咐虞人莫張羅。翔集見幾吾能預。惟茲勁節棟樑材。封號大夫錫嘉譽。濃陰棲穩夢不驚。風雨漂搖無足懼。余聞此言惺然悟。濤聲謾謾如相助。吁嗟乎、松留鶴兮蔭愈

白 鶴 軒 集

詩

清。鶴得松兮身愈固。煙雲覆蔽羽毛豐。須臾一舉神霄去。

二四